

近代詩鈔

—

近代詩鈔

何紹基

紹基字子貞號援叟湖南道州人道光丙申進士官翰林院編修有東洲草堂集

石遺室詩話湖外詩墨守騷選盛唐勿過雷池一步援叟及程春海侍郎之門出入蘇黃才思皆有餘朱伯韓序稱子貞自言吾爲詩取達吾意而已吾所欲言縱筆追之而卽得焉天下之至快也吾所欲言心知其然而手不與之相肖焉此不可以責之手也莊周有言風之積也不厚則其負大翼也無力所積者誠厚矣而非徐而疾之亦不能以詣其至子貞平日肆力於經史百子許鄭諸家之學所爲詩不名一體隨境觸發非積之厚



而能達其意所欲出不能爾也梅伯言序亦略云然苗  
先麓序稱雖爲貴公子乃健步善游芒屨簞笠打碑訪  
古雨滄雲臥遇者不知爲何許人通籍後使車所至奇  
山秘壑探幽躡險不能自休每與余縱談及之目足俱  
爲飛動張石洲序云客有誇子貞庖饌之精者穆曰子  
貞之饒無他謬巧只是本色而已子貞之文詩書亦無  
他高妙只是本色而已旣而思之本色者何真而已矣  
真者何自寫其性情而已云云子貞先生於父母兄弟  
朋友之間性情篤至溢於詩者非夫人所能僞爲而劬  
學至老不倦故金石書畫題詠視復初齋亦有過無不  
及至閒喜用通俗語詞如湘省釐捐薪水寬坐卡如斯  
况做官鄂州試上火輪船北看郡臬兩衙門昨日開場

大雅班花翎兵備蚤揚譽自鳴洋鐘將報十等句爲世  
詬病不可謂非本色之過也

東洲草堂斷句可誦者如詩心到處能聽雨畫裏憑虛  
自作樓老去一官清似鶴集成千卷韻於琴政餘讀畫  
千峯雨別後看花萬里杯閨重九日歎復歎看十三陵

山外山夜郎萬里看山眼秋士三千聽雨聲夜雨念應  
試士子

班傳循良先蜀守唐賢蒼莽有嘉州錢俞麟士  
出守嘉定名酒好

風烏夜曲快雲奇雨白公祠西極崑崙方右顧中原郡

縣盡東傾由戢眉下  
欲遊瓦屋拚與一旬三度醉蕭然兩叟萬

枝花雪後商量無限味春前多少未開花使車愧未周

天下遊記今才補粵西真可絕交何必論既能招隱不

煩詩待傾除歲凍醅酒來看破春油菜花

將出都呈吳蘭雪丈

我生廿三歲始從先生游夙企喜未負今歡欣得稠柴門習屢  
叩宿醞無新藹吟聲不出戶獨唱息楚咻大雅久殘歇衆作皆  
浮漚噓寒詔郊島逞艷凌枚鄒纖柔侈陶孟狂樵矜曹劉造物  
只一器餘子來雕鏤元氣遂苦窳虛墮成贅疣先生倡元風大  
力挽頽輶森持一枝筆獨拯萬象囚有時鼓作氣迴野奔羣牛  
有時默然息潛淵媚老蚪乃其質厚姿字稜挾鬱適上入九天  
直下襲黃泉幽先生乃言曰吾語子所由吾家古昭武臨汝環  
雙流少小負奇氣讀書坐高樓筆峩五岳墨海規方州文章  
儷鶻鷺逸態追鴛鴦靈椿乍一折寸草難自蘇披衣露跟肘乞  
米艱豆區一第況不就薄祿庸足調辛風撼四壁凍雨冥千郵  
沈淒出吟嘯悲咤填膺喉平生媿忠孝敢遂忘耒耨年來兩足

健徧覽萬里周東游小秦岱南眺窮越甌廬山武夷曲蘭櫂青  
竹兜大江屢洄沿一路迎輕鷗勝賞憶孰最投老思羅浮羅浮  
萬梅花釀海雲焮焮下有千歲根山腹騰蚘蟻吐爲百重雪妙  
藥瓊瑤抽徑騎仙蜨行眼底皆蚍蜉何當辭朝籍願此營菟裘  
噫嘻是梅也先生詩與侔根柢鎮蟠孕英華坼萌句以彼逐時  
好婉豔偕英彪居然飾蘭蕙無乃嗤藿藿陶公今彭澤美政無  
與儔

謂李  
文

前年我初覲黃堂憩鳴騶吟雲坐官閣話雨明鐙篝

一日向我言涕泗先瀟泚老友吳少微一別經幾秋西來問寂  
寂北顧雲悠悠春明憶昨夢聯襪皆詩侯吳郎最奇宕花底搖  
白頭長掉鯨縱壑孤軒鷹脫鞞然而秉貞固演池爲吟謳千秋  
障頽浪一掬懸靈湫咄哉古之健吾黨茲無逮長安汝歸轂爲  
我相諮諏我時聽聳默不敢隨咿嚶行行愜所赴中夜驚鞭鞞

望門日願見人事苦逗遛誰知我陶公脫手歸山邱踣塵走且  
告老懷增悵惆悵神迷寸臆洵淚盈雙眸匪惟歎契闊亦且悲  
寸猷宛轉觸新恨駢驟集古愁叢叢百年事促促千歲憂賤子  
果何幸三瀆遂蒙求呈詩不及寸珍飾逾琳璆批卻大講討鑿  
彩除瑕尤爲山當造巔峿施謝部婁學水當窮涯涓滴辭涔溝  
諄詳喜且勵大言發區督鴻才出名節小技殊佔謫功勳典彝  
重道德純華留方今際太平雅頌敷重麻願彈先生琴上和虞  
廷球陋質敢不勉彳亍巡前修方當戰鷗鷺駕言馳駒騶楚山  
浩汗來湘水青如油整別雙槐街歸棹一葉舟離懷滿蘭芷采

采臨中洲

愛山

詩人愛山如骨肉終日推篷看不足詩人腹底本無詩日把青

山當書讀我今半載湘之陽峰迴嶂損相扶將嵐光翠色豔如  
雨飛來灑我征衣裳轉憶緇塵深似海山水情懷百無在自知  
面目已垢淹卻對青山自慚悔詩人愛山不住山豈知山意殊  
所慳白雲送客過江去青山終古慈悲顏

舟中置酒一瓶每日可得數觥有餘適矣

平生無酒亦蕭然軟飽三杯得靜眠長日不醒仍不醉此心非  
夢亦非禪梅梢香透詩中字雪後情融觥底天更有大瓢能貯  
月好培活火試新泉

雪甚大書於壁

迷空大雪三千尺乾坤凍作梨花坼倏如萬年不化之老冰結  
撰江山無縫白半載征車兩輪滑一夜遲遲寒不發干將笑斬  
玉龍迴手拾茆柴煮鱗甲



書韓蘇石鼓歌後

西京仁厚騰騶麟中興豁達車馬新創易蝌文構十鼓別模魚  
柳輝千春周雅不編秦什漏幸免箋詰來訟紛天公有意護純  
寶翳昧其迹全其神迭更八代韓子出西望作歌餘歎呻蘇公  
繼賡竝奇特秋高二華同嶙峋廬陵集錄始辨博薛楊摹繹增  
粼玢終看崇皮入太學幽志好古同慰欣陽冰齊名首擇木退  
之本是升堂賓唐卿蘇中復吳玉筯絕皆與坡老爲朋羣昔覲  
潮碑軼章草潮州題近覽諸城留八分東坡八分題端莊婀娜  
竝無匹詎追斯邈猶逡巡如何大筆謝爰璽坐看餘子蟠龍雲  
始知鉅儒異侑識旣匪專究無矯云先後吟哦寄此鼓意象感  
激非因循或云嚴密讀難曉或云八九歸遺淪一任摩挲露跟  
肘不敢批引勞繩斤冥觀洞入古歡集珊瑚天矯嘉禾陳依然

至寶不雕琢徑與貞璞還元醇噫予昆季生更晚強索彝鈇譚  
周秦偶磋百璧范大篆更參八體誦說文竭來秦臺恣模覽益  
信此碣尊無倫何當杜門寫萬徧千古一筏求其津敬爲兩公  
一補憾待鏤玉檢敷皇勛

時與子毅弟用甄摹  
嵌置學院署四照樓壁

閏五月初七日夜半大雨庭水入屋戲作

堂空夜靜雨聲粗驚起先生拍枕呼幽夢幾曾醒蝶鹿破牀先  
已化鷗鳧移鐙檢點青氈客抱被踉蹌赤脚奴卻問杜陵千廣  
廈可能不漏一間無

邯鄲

天上桃花有莫春仙靈位業也陳陳如何一枕黃粱後不見先  
生再度人

求仙何必是丹邱不學長生學遠游三尺吟肩萬山裏尙無閒

夢到封侯

雨後涼甚

嵩少拚成汗漫游，閒庭小院且勾留。  
炎雲作態乍成雨，林意無心偶到秋。  
枕簟新涼聽鳥語，樓臺夜色有螢流。  
前山正覺蒼蒼在，路滑煙深可自由。

惕吾丈出示陳公祠下中秋玩月之作奉和元韻

高懷絕塵襟，隨緣發奇賞。  
溶溶半庭月，兀兀千載想。  
瑩然冰雪性，坐對天宇朗。  
沈吟緬先哲，感激在里黨。  
庭花寒更妍，妙資秋氣養。  
攬芬有餘寄，撫迹重遐仰。  
佳節迎重陽，清飈倍肅爽。  
前山

正懼秀杖策羨孤往

時將往三河看山

入都前一日值雪三首

浮光萬里空復空，行人直入空明中。  
乾坤混混晝夜壹，況問南

北兼西東凍雲不復飛野水不復容惡塵不復驚炊煙不復紅  
騎犢邨童午猶臥道旁翁仲不復翁惟有行人敝裘在劇冷一  
偈溫尤濃明朝入門老親笑我兒來自瓊瑤宮

願天無再雪再雪山無蹊願天且莫晴一晴路如泥不晴亦不  
雪萬景舍明滅不雪妙不晴一片真空明奇哉空明有時滅不  
空不明又何說牀頭敗葉差可燒芋子能熟水能熱

靜思萬古先陰氣苦搏結無風雨露雷天地一丸雪四隙騰微  
陽百彙競牙葉蒙液與暴寒任爾作嗔悅時當陰極見本根今  
日真靈恣飄瞥世人那得知玉戲詫奇絕惟有幽人覩元造蕭  
然一臥太素穴勸君遇梅不復吟雪花六出天地心

寄吳鞠裳南陵

人言衝劇宜遷官我謂好官先樸閒羨君別我忽萬里一烏紗

外是青山青山修修濯春雨箚霧蠻煙皆媚嫵朝寫百幅供色  
養莫詠千篇當治譜山中童子初受經求公醉帖來公庭愛公  
讀書好風調有子學賦歌雲屏誰家老農涉官事失卻耕牛煩  
處置攪公一夜眠不得比似苦吟爭半字

大雪用坡公聚星堂韵兼效其體

天宇倒垂雲四葉霧結煙消乍飛雪日望瓊樓儻可到昨夜東  
風吹路絕起聽一林凍雀語臥歎窗前枯竹折時有長亭短亭  
露已訝千山萬山滅我思膏澤兆豐年天公神柄誰敢掣奈何  
昨歲麥無芽坐遣愁民眼生纈只今陋室鋪瑤華卻笑豪家裝  
木屑杯酒無餘太酸冷殘鐙獨把明飄瞥何當嘉頌侍臣陪瑞  
語淋漓粲堪說不然醉獵西山來馬上賦詩袍植鐵

送吳蘭雪丈之官黔西州

庚寅

澈翁澈後道緣深猶爲梅花日苦吟老去一官清勝鶴集成千  
卷韵於琴浮生飽看中原月絕徼來搜太古心路入龍岡讀書

處快攜遺墨證幽尋

文藏  
生墨  
迹明

烏江西去鴨池迴立馬晴雲鬼箚開崔寔治邊方最績文翁勸  
學廣陶才政餘讀畫千峯雨別後看花萬里杯我有吟情早飛  
越從公山水窟中來

汪孟慈農部招同楊季子陳東之王口口游二閘

孟慈時  
以倉差

於閘口行館奉母舟中宴罷出  
紙索季子東之及余書甚暢

蘆花瑟瑟柳鬢鬢冷客招來恰兩三十里水光明郭外一船秋  
思到江南陔華別有官居樂煤麝偏宜野趣酣難得篷窗煙雨  
裏乾嘉文獻滿清談

顧南雅朱茱堂兩丈爲張淵父畫梅皆有詩淵父皆疊韵

答之余爲書後亦用其韵

深秋風葉如雲委家家埽階呼童子世人都有歲寒意是誰堅  
臥冰雪裏張髯本是深山人鄉思向人不可已屋小如舟書滿  
牀翛然梅花森兩紙冬霰欲零君未知春風時來花不喜清香  
墮壁入我夢吟聲出廬掩鄰耳卻懷顧老鐵石性不共年華付  
流水朱翁雖貴筆逾冷凍研醅顏將老矣暮雲茫茫天不晴紅  
塵紛紛我稽此歸心如月滿茗鬻湖上梅花正清美把君詩句

到江南持詫王陳定誰比

謂王堯生陳九香時在  
浙署皆淵父所善也

聽雨圖爲鄧雲渠湘皋兩丈作

蟋蟀悲秋菊池塘生春草古人重友于寤寐傷懷抱何如此圖  
畫招之入山早長途雨聲繁家山雨聲好聯牀無夢一鐙春獨  
夜愁霖添苦辛世閒人人解聽雨東西南北少羈旅

湘皋丈命題賢祖松堂讀書圖

讀書松樹裏人意與松清四山風雨來不亂讀書聲讀書如此  
松柯葉通靈光立身如此松寒堅出奇蒼

望雪同子毅作

狂風感夜氣馳驟聲相及寒棱懸空中相逼苦迫急肅如洞壑  
悶轟若波濤立捷如劍俠過慄似荒鬼入鏡啞月魄瘦脂枯日  
輪遛青山空崢嶸流水忘於邑孤羆蹲欲塑老蛟暗有泣木裂  
易晨樵井洩艱夜汲骨森僵似木膚凍皴有粒手戟指未知鬚  
冰屑不溼棉鞞踏成鐵氈冠化爲笠擁裘無客來對火得酒吸  
安得六出飛更喜三尺集龍鱗浩浩溶溶鶴羽任緝緝要看玉萬  
疇願陟塔七級咀此冬霏華甘比春雨汁豐年幾時占荒句不  
可拾奈此苦寒何梅花暗香襲



慈仁寺荷花池四首

泊船先戒榜人譁避熱來尋古佛家好是淨因香火地有三十  
六畝荷花

坐看倒影浸天河風過闌干水不波想見夜深人散後滿湖螢  
火比星多

題陳少香大令

借燦

鷗汀漁隱詩藁

畫所不能到詩從何處求

集中

羨君兼二妙恣意得窮搜游興

健於鶴詩情閒若鷗墨緣重記取一片鼓山秋

少香分  
校閩

贈魏又瓶時爲永安校官

一自錢塘江上別風光飛越七年餘貧無甌石猶沾酒閒對青  
山老箸書肯向紅塵虛日月更從大海狎漁樵相逢鴈燕難相  
聚記取江天落葉初

林和靖梅花三十絕句墨稿羅六湖比部藏

詩如東野書西臺雪堂雙井交尊推豈意停雲兩札外遺墨零  
落湖山隈山人愛梅本天性爲兩三朶百千回酒痕茶角盡閒  
事日問梅花開未開何來詩草三十首妙語繹繹春風催客路  
飄蓬果何事想當游櫓沿江淮是時孤山未結屋已覺塵世不  
在懷廣平或可語心事彭澤相與忘形骸書律跌宕亦無偶居  
然梅榦虬龍走紙光想見槐木椎筆精當出葛生手六湖愛賢  
非好奇寶此集外冰雪詞山雪夜明鶴無影更有山人詩外詩  
回憶壬辰閏九月余方游昌平復成一律

元默執徐燕市客秋來未放酒杯閒閏重九日歎復歎看十三  
陵山外山古意忽逢圖畫裏前游未墜夢魂閒今歡昔恨終何  
極且息塵機靜閉關

別顧先生祠

亭林先生祠小子始營繕繫惟城西偏慈仁森佛殿當時寺宇  
宏市集萃圖卷國初諸老儒買書乘暇宴先生結契廣僑寓置  
鑑扇至今雙松下仿佛見遺跡承平二百載光陰若流箭古碣  
餘斷龜空梁墜飢燕我卜隙地寬謂可靈爽奠諸公聞此議合  
作相呼忭畚鍤猥見屬木甃自遴揀刪燕出古樹明月夜來冑  
崇崇屋三楹爛爛秋一片落成奉遺像覽揆潔盥薦肅然道義  
容警我塵土賤車徐譜歲月張子重論譔江南大河北餘韵蒐  
討徧張石州據車秋徐星翁所撰亭林年譜合爲定本增益  
辨正甚博且精摺稿至山東江南蒐得遺事詩文頗多

勒記待貞珉儀徵濡老硯

阮相國師到

冬霁條已飄春鷲復來

轉次第皆識職初終矢無倦持衡恩命被萬里指羅甸登程復  
過祠仰止有餘眷滌惟明代末世苦龍蛇戰氣節誠乃隆兵將

多不練小儒獨何爲俗學爭相煽語錄節陋窳詞章鬪輕舊先  
生任道堅千古係後先研窮經史通曠朗天人見鬱積忠孝懷  
慘澹時世變同時顧李閻驂靳隨勒鞞餘子因人成鞭鐙亦相  
戀經心執聖權首啓熙朝彥兵刑禮樂尊九數六書衍漢宋包  
羣流周孔接一線精光爍日星果力策雷電自非菘中人孰開  
衆目眩欽惟純廟年四庫盛編纂萬軸歸文淵千士萃祕院儀  
徵實後至草荆儒林傳論學采源流全編有冕弁奏御當先皇  
乙覽大稱善阮師撰擬史館儒林傳歲以先生居首至嘉元氣  
慶初年顧文苑據藁立傳進書時即依原次

入人心史筆非私擅小子雖惜學遺書早窺眇泊與修史職讀  
傳生歎羨從來聖道大青史資爛絢微言察天地正路化狂狷  
功名與文章因時見陶鍊惟茲下學事萬古有繼禪儒林道學  
分宋史妄矜銜六藝天道樞班書儒林傳語意傳例重班掾先生冠儒

林狂瀾植厓堰君親鑒吾身學行須貫穿願從實踐入敢恃虛  
談便且當語黔士庶弗規爲瑱再拜別先生歸來已寒霰

到常德得楊性農親家信喜晤阿兄荔農

荔農十年不相見意氣向人彌穩練雖云壯志厭看鬚無奈老  
痕都著面朗江清清不可孤高杯大扇容狂呼崑崎歷落休相  
笑脫卻征袍一野夫

修梧奇竹性農性文采幽騰風骨正一第蹉跎笑問天千秋著  
作還爭命書來告我秋閉關舟車高掛風日間母健妻賢兒子  
秀讀書飲酒看青山

鄧湘皋丈見示沅湘耆舊集竝得知湘中故人近狀感歎

有作

丈人顧我歎不見十年來慘澹名山業遲留夜月杯秋荒聽雨

屋雲渠丈春老授經臺仲耶小舉廉問到河西墓蒼山萬木哀先文

安公葬長

一慟成耆舊蒼涼數首詩楹書雖好在洛誦感深知先公全集

就傳誦者六省魂斷聯珠集才憐片玉詞亡弟子毅詩趨庭今

夜夢悲慰兩俱疑出都以來吾父與毅弟幾於無夜不入夢

短燭看身世深談抵嘯歌感時秋水至時各郡縣讀書故山多

丈人為題王蓬心老筆紛金石沈栗翁高吟尙薜蘿楊紫卿文

章繫忠孝期獎意如何

輿夫

輿夫生山中山力聚兩股加以兩綆牢有似傅翼虎荒石不成象凹凸生鋒距直上若登天面對赤日午造顛乃復下行子不敢俛橫覽強自排顛頓且由汝森壁連側斜十里無棲羽炎日

近代詩鈔

何紹基

十一

炙幽蛩啾啾聒林莽

山雨

短笠團團避樹枝初涼天氣野行宜谿雲到處自相聚山雨忽  
來人不知馬上衣巾任沾溼村邊瓜豆也離披新晴盡放峯巒  
出萬瀑齊飛又一奇

玉筍堂詩

有序

道光甲辰秋七月余與萬藕船學士使黔行至沅州阻雨  
謝篠莊大令同年來晤於行館適後院有隙地頗就蕪余  
曰何不及此雨候盡與種竹乎篠莊欣然卽令人於城外  
移來數百竿不半日閒風梢霧葉修篁成林余聞篠莊爲  
令敦俗重儒士氣興起因題一額曰玉筍堂蓋非徒記一  
時會合游憩之樂亦冀此邦人士抱節浮筠干霄直上有

如此竹也既別後復作此詩紀事以張佳話寫餘興焉

沅州一夜浪浪雨路滑雲深滯行旅奇想忽從荒處生人功正  
及天膏聚此君排闥至何速官符促調誰能拒昨夜吟酣野外  
秋今宵醉裏城中土揮詞木魅越牆走驅使山靈荷鋤舞雨聲  
方戰竹聲來狂風下瓦雷伐鼓泥中漚漚百夫忙煙外蕭蕭萬  
葉語主客相視竹大笑我有贈言煩記取深冬大雪要培壅來  
歲雛萌戒偷煮頑鞭易長佳篠難屈節須芟稀處補豈惟要術  
仿齊民頗謂用心通治譜長官愛客兼愛竹因客得竹固其所  
長官愛竹尤愛士護竹如士培植苦我家瀟湘初發源沅澧通  
波連五渚從來桑梓有恭敬忝賦皇華漫矜詡學士先題珠玉  
詞吉語定符鸞鳳羽我書玉筍榜虛堂愛士如竹客卽主雙星  
使者宰官身韵事忽逢萍聚新深談商許到身世明日別離多



苦辛驛館華鐙今夕酒渡頭荒樹古來春他年鴻爪如重印佳  
士修篁是主人

谿水惡

便水驛早發過沅江舟人云前夜雷雨時有山谿水暴長  
漂失屋廬人畜數十家感愴有作

谿西種田谿東住谿流清淺赤足渡物外炊煙數十家板屋彎  
環水回互人人皆言谿水好浙米灌園無十步誰知昨夜谿水  
惡大雨一天千澗赴懸流十丈夢中來樹飛屋走無人路男漂  
女沒不相知雞犬豬羊竝同去谿水依然平澹流浮尸日出過  
沅州戚黨招魂向何處洞庭東下海西頭

賀藕耕中丞丈得子愚弟六月廿八日書有家中平安語

遣人持示典試例不得通家書也且慰且悵

萬水千山少鴈聲平安傳語未分明高堂白髮行人淚一例關防似不情

夜雨念應試士子

響透空階潤逼衾垂簾無寐酒難斟夜郎萬里看山眼秋士三千聽雨心今年止三矮屋支殘檐溜直寒更敲到燭花深淩雲畫日文章福莫愛精神一苦吟

闡墨刻成合四書文及經策得六十餘篇炳朗可觀同人

謂黔中從來所未有喜成一律

玉尺樓頭大月懸奇光照徹夜郎天秋風鵠立三千士滄海蛟騰四十賢經術居然參許鄭才思時復到雲淵聯珠疊璧欣傳示爲破荒寒二百年

晉孫夫人碑書後

晉任城太守夫人孫氏碑自乾隆甲寅江秬香始得石於新泰縣新甫山中黃小松司馬爲之釋文阮儀徵相國師據以入山左金石志者也余久得拓本顧未深攷茲於蘇谿前輩齋中得見秬香初拓本及小松手書釋文竝錢竹汀王述庵孫淵如武虛谷桂未谷洪稚存王伯申伊墨卿陳曼生翁覃谿諸老竝儀徵師題記石墨增華文采斯萃因細繹釋文推求拓本尙有數處誤仞者如今我不犯尊而蒙優詔乃是今我乃犯尊而蒙優詔也同歸殊塗爾其口哉原釋皆缺實止哉上一字不可辨也有口口意時夫人身口在家止父令留而謂父曰功成而退雖天之道然事君不懟口能口倫聞口口口爲吏部尙書多用老成先帝舊臣舉口不絕必不忘

君旣而果舉君爲侍中此段原釋脫誤字甚多也夫人在羊氏沈重有度沈重二字當補釋任城非夫人姑口生姑字尙存其半上感慈口口飛口口下惟詩人刑子之言瞻前口後率由弗違以御于家邦終始以孝聞口口夫人之力也此數句原釋亦多脫誤也口方不肅之訓方誤爲力方上蓋義字也口口歎曰其嗣子之歎詞歎上非乃爲二字也令問日新令字當補也夫人蓋早喪母而孝於父所生子不育而嗣子迅爲之銘也按魏志盧毓爲吏部尙書使毓自選代乃舉阮武孫邕帝於是用邕管寧傳侍中孫邕薦寧孫邕蓋卽夫人之父矣文帝典論北海王和平亦好道術自以當仙濟南孫邕少事之卽其人也鮑勛傳帝屯陳留太守孫邕見碑僅

言爲勃海太守者略其一耳齊王芳紀注引魏書景王  
與羣臣共爲奏內有光祿大夫關內侯臣邕以論語集  
解序證之卽孫邕也此不言關內侯而言建德亭侯豈  
後復改封歟任城王國當稱內史但內史亦可借稱太  
守且據沈約宋書則任城在晉亦常爲郡也魏志桓階  
字伯緒長沙人此作伯序者階陞也序東西廡也作序  
者正字作緒者假借字爾雅序緒也同音同義得相假  
借也桓階爲劉表從事祭酒表妻以妻妹蔡氏自陳已  
結昏拒而不受因辭疾告退此得復有少妻伏氏致文  
帝令邕取之者蓋繼室也洪景伯跋廣陵屬國侯夫人  
碑已有漢夫人墓銘石刻存者止此一碑之語又晉武  
帝紀咸寧四年詔毀天下墓石故晉石傳者絕少況婦

人碑乎朱朗齋以八年爲泰始八年王伯申以文母爲  
文德之母說皆可據新泰縣志載任城太守李夫人碑  
李字直孫字之誤耳至袁桷謂漢晉以上婦人無立碑  
之禮引齊書王儉論太子穆妃不須石誌辨其爲僞膠  
柱之見不足置辨也倚裝題識復作詩一章以志欣賞

我昔壬午年廿四東山使節日隨侍徧甄秦後篆分碑始讀儀  
徵金石志任城曲阜兩京富歷山雲峰六朝萃典武寥寥片石  
孤任城太守夫人記我思洪氏生未晚侯夫人碑早珍異何況  
咸寧詔毀碑一代貞珉付荒墜夫人賢孝非偶然天與護持神  
與閼堂堂一千五百載朗朗二十八行字江郎得石黃子讀題  
者錢王孫阮桂泰山國內秦刻餘跨越兩京此碑嗣任城山色  
增古顏新甫柏林奪深翠

秦碑

安碑

此碑

今日

復置

無兩

京碑

湘中

好事

羅君

章馳驟藝林如渴驥獲茲初拓喜愈默忽出示我憐同嗜樺芬  
菊燦秋不留畫古書清客難醉此碑持抱雨三更勤與搨掌鐙  
一穗蛛絲蛇跗細尋究補脫刊訛富新義狂呼咄咄檐鳥醒墨  
瀋輝輝硯蟾媚卻愁詰旦使車發未緣三日碑下睡人生萬事  
固等閒傳與不傳天所置君不見泰山羊氏名德崇祇今峴首  
無碑空墮淚

中丞丈人招飲時苦雨快晴席間得月初京寓書喜而有

作

脫帽看天呼快哉清風吹我笑顏開三旬黯澹千山醒一紙平  
安萬里來石鐙盤旋花氣勇金尊凹凸鶴心猜東華近事頻煩  
問艱鉅應需濟世才

觀音寺公宴

甫拜君恩宴鹿鳴還憑佛閣萃篋纓數來佳士花枝淡無日不聞諸公

詩今年得看徧奇山酒盃清一水樓臺皆畫本寺閣臨水深秋絃管

卽春聲稿外各署俱終歲不得演劇邊州飽閱昇平象月落城頭

別緒生

九十九峰堂詩贈陳訥齋直牧

出省第三日與藕船迂道廿餘里至平越州小住一日

冒雨看山歸飲州署正對九十九峯因爲訥齋題其堂

額兼賦詩爲別以誌良友雋游非可多得也

身長八尺須眉蒼和如春風朗秋霜英姿尙挾閩海氣雄州高

據黎峨鄉伍符尺籍竟瑣瑣男令植穀女課桑訥齋所至以公課農桑爲先

餘宴坐門洞啓九十九峰來此堂黔陬從古萬山會一落蠻箐

無輝光此邦況是播州壤橫貫粵黔爲戰場宜孃山頭峙古壘



武勝關外紛遺檜國家治平二百載民苗化梗士秀良堅城削  
鐵前代築偉略尙想郭子章郡閣俛睇可百里峰尖迸露無餘  
藏我慙持節拓文軫翩如乘雲來大荒平看萬嶂止一曠未許  
巖嶠撐吟腸與君聯事三十日論文道古多慨慷玉尺樓下落  
葉積秋事坐負黃花黃重陽薄游頗不惡所苦袍烏難我忘穿  
山頓轡指平越老穉走覬驚如狂幽懷萬斛此一寫若箭離筈  
馬脫繯潮音閣前水碓響仙人洞上烟杵涼縑幽伏肖蛇狢竄  
躡險矯作龍鶴翔歸來此堂息以踵遠峰齊向空飛揚烏江一  
綫隱滴滴翠岫百笏排踳踳一峰江內意自靜九十九峰終古  
忙隔江招邀徑到戶堆青潑紫滿屋梁頑雲猛雨苦相拒雨聲  
浩瀚風滄浪峰形變滅不知處令我矯首空低昂明朝揮手白

雲外酒杯詩硯皆茫茫

灘行

犖确十日行重累萬山裏雨路亂亭埃宵厓睇篝火昨上獎舟  
船心穩夢亦可清晨解纜去灘走疾如筇長年呼何戾僕子魄  
已墮顛倒誰使然百事非由我聊可擁絮眠天地一螺贏

山下千里江江下千里山荒山載亂水百里爲一灘舟子老狎  
浪舷艣多盤桓耳目所不及平地森神姦泠泠一丈水詎有蛟  
龍蟠

山轉灘正拗灘吼風又作風力脅灘起百丈不可落聲喧百雷  
霆白舞千鶴鶴扁舟赴的猛不費半篙著十里一曠閒瞥似輕  
燕掠念彼上灘人何處穩船腳

危石吞我舟舟小何足餌一篙點欲飛百怒忽成媿巖間古雜  
樹露果赤顛媚山猿夜夜來飢涎溼通臂灘聲驟如雨雨候忽

已至石上雲團團一白掩嵐翠

澂懷園詩廊故司農程春海師所構

園屋南鄉因迎陽乃鑿北窗連水光屋北之水少見日易夕難  
曉六月涼其閒靜理有萬族蒲荷草樹同蒼茫樹頭鳥聲特幽  
脆石根蟲語皆堅蒼澂懷之園本天上內廷倬直玉佩鏘歸來  
退思亭宇靚尊彝屏几爭輝煌此間一物無可著僅容茶角兼  
筆牀司農吾師發幽想謂宜賦詩與置廊當時海宇正清宴賡  
歌喜起如虞唐十年一曠成故事水外似有吟聲長

十月十四日拜潛邱先生生日於苻靈書屋呈主人張石  
州及苗仙露呂鶴田馮魯川楊靄亭王子懷何願船時  
余甫於廠肆得古文尙書疏證五卷寫本後有潛邱自  
跋云五十三歲屬閩中謝君畫禮堂寫定及傳與其人

二圖秀眉明目觀者咸以爲康成不知實以余像代之  
云云余卽以入詩石州見之喜極詫曰作年譜時爲何  
不見示余曰前日才買得爲今日拜生日詩料耳大奇  
大奇是豈尋常翰墨緣邪直是先生精靈來感發託付  
矣敢不承敢不承吾與石州勉之護之

五月廿八顧子壽十月十四閻懸弧月日盈縮宛相應二子學  
術固合符亭林祠亭夏雨潤羣賢紳佩來于于今晨盍簪八人  
耳荐蠹書屋酒在壺主人晉產語座客吾敢有私閻子乎潛邱  
樸學務精鑿與顧博大體略殊遺書讀者或頗罕何事樂敦紛  
招呼同心耆學得數子景仰亦覺道不孤貴從微尙審得失難  
與俗子論肥癯我思此語未云盡理固有漸事有需昔年顧譜  
述且作甄輯前滂車徐胡今年閻譜君叛構急墨諸版祁司徒

兩君生平廿載隔二譜並出相唯俞它年承學稽覽揆略似夏  
歐冬則蘇余惟潛邱少也魯成童頓握靈蛇珠日程月課劄記  
作四十乃敢凡見數尙書古文破積妄每一卷就多踟蹰華頂  
羅浮早藏皮禮堂寫定先製圖圖成五十有三歲後至易簣功  
仍劬艱難審固無此比心力真挾金石俱精神不朽可百世自  
亭林外孰並驅將來禮官上論列宜侍聖廡馨觴觚辨生末學  
冀速化浮漂慨似風中蒲太原經神有繼軌主人碩舟今碩儒

碩舟昔游江南余附書寄阮也

表章前哲啟後雋薪以火傳鼓

應枹良辰敬效拜經義秀眉明目奚從摹閩中謝子不可作何

不且倩吳門吳

謂吳冠英

我生半百百不就隻義偶獲嗟已膚門前

車聲疾如雨書卷恆被塵土汗寒齋展侍氣一肅敢不十駕勤

鞭駑

伊少沂見示劉文清爲尊甫墨卿丈人作書並丈人自書

文清詩合裝卷奉題一首

文清專詣固在書日揮百紙擊乃舒至今流轉徧天壤眼中日  
日逢瓊琚韻語閱惜不謂足慧力風趣書之餘墨卿丈人錄成  
卷意在表微仍叩虛藝雖兼進有偏勝難排公論矜私譽丈人  
八分出二篆使墨如漆楮如簡行草亦無唐後法懸厓溜雨馳  
荒蕪不將俗書薄文清覲破天真關道眼留春堂詩春水明乃  
與諸城並涵演推挹想見古情性惜未侍側聞論辨少沂作吏  
治譜存作書亦惟家法尊貺余十字在齋壁時令愴寂懷汪倫

十餘年前與少沂未相識承作隸聯由汪孟慈處贈我今孟慈已作古人矣積年思慕始一見酒杯

波湧詞瀾翻殷勤索書乃到我風尙雅共前賢敦篆分真草止  
一事或源達流流澗源連晨大雨繁草木枝葉浩瀚皆本根

陶然亭餞俞麟士出守嘉定

疑野小軒常潑墨看山高閣共尋秋  
幾人舊雨能狂醉一夜蘆花起  
別愁班傳循良先蜀守唐賢蒼莽有嘉州  
它時重上江亭望極目西南羨壯游

黎月喬侍御酒後索詩贈別疾揮而就

齒牙未及脫鬚髮初欲蒼行步健黃犢年甫半百強何爲不自  
釋日日思歸鄉君言非退尙亦非有激昂自點烏臺職諫紙積  
盈筐十疏九不報甚愧愚且盲慙可避賢路游興江湖長庶幾  
身世理推究轉精詳或因著書老永付名山藏或爲出岫雲與  
世敦農桑出處後難卜臨分祇傍惶交君廿餘年情好如弟兄  
切琢在道義氏厲有文章每懷言笑際元氣到混茫槎牙不及  
斂往往見鋒芒豈真好馳騁甘蹈疏與狂中有不獲已冀挽俗

頽唐幽思互珍閱直道勉扶襄臭味久益合蘭蕙聯芬芳同志  
豈能多比歲多分翔君復別我去疵謬孰相匡驅車歷燕齊因  
循過徐楊旋飲章貢水始及衡山陽同時普霖潦行省皆報荒  
飢鴻數十萬哀號不成行仇離方滿眼能不悲中腸惟當遣其  
行早艤湘中航天下山水秀無有如瀟湘屈宋始摹續元柳更  
張皇幽深最無際曲折實難量湘山不負人自狎塵土黃羨君  
此去好脫落篋與裳布衣濯水源竹杖破山光家園萬梅花開  
出山酒香好共老昆季亦喚兒孫嘗回首望京國一夢醒黃梁  
如有田家詩爲我遠寄將臨行就我酌菊花撐屋梁月色亦何  
好夜半天欲霜離緒不可理語笑斲成場目下才士藪投贈鏘  
琳瑯我詩誠草草未免別懷傷

西谿銷夏圖詩

近代詩鈔

何紹基

二十



西湖天下勝游跡人人說豈知西湖背西谿更幽絕西湖如佳人  
舊豔足怡悅西谿如靜女深屋自冰雪我曾谿上宿正值初冬  
節蘆花浩如海小艇來飄瞥夜眠谿上樓心神耿清澈不知在  
杭州何況塵土熱彈指十年事湖山成久別翩然圖畫來烟水  
百曲折詩老發高詠僧語亦頗傑我生惜已遲不共吟槩掣但  
覺空濛景未隨塵事滅哲嗣我所敬敦詩續前轍畫梅枉見贈  
花寒枝屈鐵西谿及歲宴梅花萬藥茁君歸急往遊窺破古春  
泄更作吟寒圖足與銷夏埒

題哦松圖

築室向何處無過松下宜聽松宜何爲把卷方哦詩百里職治  
民教養兼嚴慈歡聲四野動官長不自知却當雁鷺來日與松  
風期團團鸞鳳巢宛宛虬龍姿既非慕閒隱暫可略威儀須古

松與肖神定鶴下窺士民愛官長斬頌無可爲惟祝使君壽與  
松同不衰下有千歲苓上結九光芝芝苓並益壽分哺萬家兒  
清風時一至濤聲浩無涯洗彼塵想渴發我幽情奇如在深山  
中又似太古時靜極故善感一虛萬情隨

韶石石壁似浯谿

低篷野渡狎流淙晚寺寒鐘次第撞墨井能收諸相寂風幡難  
得此心降獨尋韶石屏開鑑略似浯谿字照江西北故山蒼莽  
接何時烟雨理歸艤

寄子敬

姑蘇城外落颿時弟北兄南聚最奇名酒好風烏夜曲快雲奇  
兩白公祠還家待補游吳記持節翻吟入蜀詩江發岷山東到  
海盈盈一水寄懷思

鳳翔東湖用坡韻有懷兩弟

古樹沿隄爭屈強晨曦冒霧尙霏微蘇祠照水羣鷗聚秦棧連  
雲一雁飛乘傳屢懷非分恥聯牀長使此心違江湖有約期偕  
隱坡老徒來蜀叟譏

眉州試畢敬謁三蘇祠與試院止隔一牆因通門以便瞻  
憩扁試時仍閉之也廖仁圃直牧陳愷人大令置酒木  
假山堂卽事有作

登州看雲海嶺外借笠屐春風西湖隄大雪黃州壁東坡舊游  
處一一我留迹微尙已半生詩文書竹石誰期紗縠行獲近喬  
木宅父子共一堂森然動吾魄想見名二子郟前授書策不敢  
誦坡詩恐被翁訶責

老泉平生學精力萃禮書幾權經史論詞筆乃緒餘或傳或不

傳有幸不幸歟譬若汶江源萬象咸包儲坡潁暢其流汪然赴  
歸墟願告學古人須識權與輿墓頤老翁井白雲蔽墳廬瓣香  
此虔跼古柏森庭除

東坡與子由雙鳳高其翔同時富豪俊幾人能鴈行文章合氣  
節既爲百世望乃其浩蕩懷得失皆兩忘巢痕滿臺閣歸夢落  
蠻荒尙友天下士何處非吾鄉有田竟不歸投老潁與常惟餘  
聽雨約魂魄在茲堂

冒雨來眉州駐節三蘇里西鄰木假山中隔一垣耳開徑仍設  
門古賢接咫尺瞻像且讀碑看竹還聽水主人能好事酒行詩  
陣起吾軍氣百倍偕作競摩壘

懺人先有詩余與王梅谿曹介  
侯師小山馬星四彭夢九及吾

兒慶  
皆繼作

看徧蜀中山此樂才有幾鴻爪太怱怱勉矣邦人士

謝黃新甫吳有齋送酒

麻衣脫後別鄉關，閱徧廬黃萬岫顏。  
意外忽叨持節重，公餘那復著書閒。  
行行官舫宜聽雨，處處江城飽看山。  
日下故人頻送酒，十年離緒暫教刪。

諸君子皆有和作復得二首

錄一

蔡蒙山色指梁州，雨脚浪浪晚更稠。  
黎雅秀才能幾輩，高樊逸韵自千秋。  
看花院靜基聲碎，論古天高酒力柔。  
爲勸風檐齊努力，威儀好與寫賢侯。

昨才論古題有樊敏高頤碑考  
秀日考古題有樊敏高頤碑考  
今日試生員題威儀也

### 猿臂翁

書律本與射理同，貴在懸臂能圓空。  
以簡御煩靜制動，四面滿足吾居中。  
李將軍射本天授，猿臂豈止兩臂通。  
氣自踵息極指頂，屈伸進退皆玲瓏。  
平居習書頗悟此，將四十載無成功。  
吾書不就廣不侯，雖曰人事疑天窮。  
同心忽遇二三子，篆分隸楷各

求工皆用我法勝我巧巧不可傳法可公惟當努力躡前古莫  
嗤小技如雕蟲烏乎書本六藝一蘄進於道養務充閱理萬端  
讀萬卷消長得失惟反躬外緣既輕內自重志氣不一非英雄  
笑余慣持五寸管無力能彎三石弓時方用兵何處使聊復自  
呼猿臂翁

孫生思九手錄十三經皆莊楷無一誤字其子道南才十  
五歲能全讀背誦是父是子吾所未見也既同取入學  
以段注說文付令講求經義並喜成一律賜之兼爲諸  
生勉學

孫郎手寫十三經洛誦佳兒水瀉瓶廢學久慚吾鬢白賞奇同  
快子衿青貴將古義尋周孔更萃羣言別渭涇莫被書廚嘲陸  
監舊文先去講聲形

小山星四夢允三君子以歸秦鄉試同日俱發適見壁間  
有顧朱兩丈題畫梅唱和詩輒用其韵贈行余方以言  
事謫官意欲卜居終南小山兄許爲留意故有末語

離筵高張酒無旨何堪一別三君子莫愁畏景歆塵飛正要安  
心冰雪裏三年同我使車行雲龍追逐無時已甄文校賦疾如  
風妙畫奇詩森滿紙笑我將如退院閒諸君方卜登場喜讀書  
事業期許同支拄時艱後先耳夔門峽窄灘如龍叩海天高月  
生水此外江山屈指難羨子先余出蜀矣杜陵茅屋涪翁池蓋  
非得已乃戀此偉哉坡穎兩詩仙達觀不道歸鄉美爲問藍田  
鄠杜閒買宅結鄰果誰比

將游峩眉

忝與持衡古益州鋒車巖壑任狂搜西山叩海天多煥劍閣夔

門氣太秋使節三年圓一夢

試被議時科

奇峰萬點洗雙眸謫官

愈識君恩重許到峩眉頂上游

普賢西向

今夕是何夕此鄉是何鄉一登峩眉顛精神多仿徨東賸齊豫  
西蕃羌北瞻秦晉南荆湘屈指五年來多成兵馬場但見城郭  
破壞人民夷傷猛將損折庸臣逃亡衙廟化焦土婦孺如驅羊  
國帑民脂膏剪肉難補瘡見刼不救何爲空王見賊不戮何爲  
金剛近者廓夷頗蠢動覬我衛藏侵封疆何不一放智炬火何  
不一動慧劍銜制而伏之爲剛猛力柔而化之爲慈悲腸乃獨  
選此清淨處無言下視人奔忙山下千千萬萬人終年朝佛來  
進香兒童隨翁媪夜住冷雨廊絲穀化金錢來充僧齋糧番回  
瞻禮更勤苦二三萬里踐雨霜我心急迫無可商來此愬佛非



荒唐菩薩亦可憐  
斂盡玉毫光  
死灰槁木然  
悲憫向西方  
不敢回頭一東顧  
萬年枯坐看夕陽

李雲生詩來招我再往嘉州  
余方由峩眉山欲游瓦屋

次韵奉報

山氣真從脚底生  
到高寒處萬僧驚

山僧云多年未見有

緣鐙

佛誰應羨滿指星辰不可名  
西極昆侖方右顧  
中原郡縣盡東傾  
此身大有飄然想  
何必凌雲羨長卿

荒山古木形貌奇詭  
瓦屋頂乃有之聊寫其似

蟠根中空成古廟  
荒落繡出世尊須畢具  
鼻口耳目竅須眉瓔珞  
見我笑我行漸遠  
日來照回頭諦視  
乃不肖山風驚起怪鴉  
叫雨漏煙霾雪霜膠失却寶相莊嚴妙

大根空中車輪懸  
枝柯歧出四面圓  
樹中有此地行仙徑  
欲飛

去隨雲騫苦被地媪相纏牽又或結根萬仞顛柯葉倒垂紅綠  
鮮以天作地地作天是於物理然不然質家傳易曰坤乾

雪霜雷露煙霧雨浸淫宿留幾千古長年不晴少和煦偶出日  
月半含吐上下不乾雲與土萬木叢立互咻噢枝枝節節長毛  
乳奇形怪相不可譜凡鳥不巢斷蛇虎嚴寒固是萬物祖木性  
堅直氣來字年深自僵謝斤斧臥雨仆雪長不腐有力致之金  
滿魁

老樹見客形態殊如跪如拜如奔趨相逐相攫相挪揄大風掀  
搖舞盤紆作氣齊力來戰吾彼勢則衆吾力孤此身疑立化樹  
株靜而視之轉麗都卻非近玩可褻汗鳳皇黃龍天馬駒靈芝  
神鼎青珊瑚奇祥異寶世所無斑斑爛爛堪指呼安得顧陸丹  
青徒寫作名山獻瑞圖

由瓦屋下山改由榮經路仍險仄至萬峯菴宿

峩眉與瓦屋天生兩山竹峩眉十之三瓦屋得七六不高亦不  
粗陰凝善孕育連山筍子棚千里來販鬻不脛走天下何止飽  
吾蜀我聞西賈言其味非一族峩產香有筋瓦屋肥多肉山性  
各使然同雋不如獨連宵宿荒寺今日命吾僕巾車避昨險言  
指榮經麓竹徑鞭亂行繭盡輿人足我乃徒步從見筍不忍蹙  
無如數顛頓不免相蹋蹴下山近百里落日挂高木出竹竟無  
時萬峯庵裏宿

編游草竟漫題一律

地志山經爛漫披紀游聊補昔賢遺少陵雪嶺松州畫坡老孤  
雲落照思儘有煙嵐爭決盪快憑煤麝恣娛嬉三年蜀道皇華  
草添得峩眉瓦屋詩

登華頂

螺旋中空萬千轉人與雲行同寫篆到青柯坪眼界寬上千尺  
瞳脚力展百尺峽接二僊橋胡孫愁時游人驕見上天梯意思  
超東西中峯皆我招乘風直上南峯頂何時跨過蒼龍頸仰天  
池水高到天月光下照人孤影月輪之小下界無游氛埽盡寶  
魄孤想見芸芸浮世事月見吾亦見真吾萬箇蓮華來揖讓峯  
峯北拱獨南向西嶽真形此夜明雪月交光天地曠凌晨馳下  
萬岫奔潼關鐙火方闐喧迴思昨夜鈞天夢落鴈峯頭過上元

詩翁約夜酌先以詩謝

詩翁與猿叟臭味無疵瑕高懷契韻外難共旁觀誇自從前月  
來人事苦紛拏復兼老成謝歎逝同嗟呀鳥鄉文翁叟時相見  
惋惋如天涯愁霖幸少住開徧牆角花翁乃折柬至呼叟看夕

霞隻雞與斗酒風味真田家對酌惟兩人亦免衆賓譁此中有  
真意古澹不可加

林穎叔招同宗滌樓朱伯韓葉潤臣孔繡山王少鶴劉炯  
甫拜黃文節公生日以日問月學旅人念鄉分韻得旅

字六月十日

坡翁與涪翁生日別寒暑涪詩令人滄坡詩令人煦從來造化  
窮正賴文章補今年炎熱甚不復分子午遺容獲瞻拜正氣滿  
庭宇復展冰雪文增我神骨古溯惟我涪翁孝友植根矩大節  
是不俗名論砭懦腐憂患真飽經志事彌堅樹縱橫翰墨場歸  
作西江主最愛說茗香還工賦筍苦草書到神速小詞饒媚嫵  
餘事爛珠璧詩心獨機杼居然黃並蘇遠匹李與杜坡公近太  
白公乎肖臣甫自從我公去誰復堪指儂六義竟寥闕千年空

仰俛林子閩中傑，傑直天尺五。榕壇學緒綿，左海文瀾輔。何處

得公像，陶廬舊摹取。陶廬詩宗陶，嚮往存圖譜。王孟韋柳餘，宋

士不得伍。孟陶廬有詩龜嚮往圖淵明正坐王在下侍乃於雙井翁別奉

瓣香炷，雖云有章列，未免分門戶。我昔使蜀州，遺跡前賢聚。兩

處流杯池，和詩照戎敍。谷敍州萬縣流杯池皆有山於緣蓋不薄

攀仰公，宜許清風颯。然至炎氣渺，何所介雅來。八人分韻拈兩

語，公乎信有靈。吾其老羈旅。

山人詩柬至謂名酒如美人，能來共賞乎。值盆荷盛開，主

客皆茗芋矣。口占奉謝。

倦餘忽聽隔籬呼，握手炎歎一笑逋。酒面勻時真燕婉，荷花開

處卽江湖。玲瓏小屋橫漁艇，兀傲蒼髯兩釣徒。今夜夢魂煙雨

裏，便隨鷗鷺入菰蒲。

題周允臣 文俞 廟堂碑關中城武二本

覃谿論書以永興接山陰正傳此說非也永興書欲側取勢宋以後楷法之失實作俑於永興試以智師千文與廟堂碑對看格局筆法一端嚴一逋雋消息所判明眼人自當辨之因其氣味不惡又爲文皇當日所特賞遂得名重後世若論正法眼藏豈惟不能並軌歐顏卽褚薛亦尙勝之余雖久持此論而自覃谿春湖兩先生表彰廟堂致學者翕然從之皆成榮咨道之癖余不能奪也允臣世兄酷嗜余書一日得廟堂古拓欣然持示且云近日方肆力習之其帖果佳然翁李之說余不敢附會也適允臣屬書小卷輒走筆吐所欲言並占小詩奉粲幸秘之勿令人見也

眞行原自隸分波根巨還求篆籀蝌豎直橫平生變化未須歆  
側效虞戈

寄題丁儉卿新獲嘉祐二體石經冊

丁儉卿舍人兄新得宋嘉祐二體石經三百七十餘紙  
爲易書詩春秋禮記周禮孟子七經玉海等書述汴石  
經不言有孟子表章亞聖自此刻始是足補史志之闕  
吳山夫嘗見四冊於吳門薄自崑家乃尙書周禮禮記  
孟子山夫自得五碑止有易書周禮顧亭林朱竹垞皆  
謂汴經久佚拓本之富未有如今日所得者旣黏綴爲  
四大冊有重出者卅餘片另爲一冊寄京師付賢郎頤  
伯兄弟頤伯來飲余齋持冊丐題余因憶祥符陳留兩  
處二體石經余皆曾尋獲摩賞行路怱怱未及詳討不



知汴中湮匿者尙有幾碑亭林竹垞謂其全佚者非也  
太宗表章說文仁宗特刻二體石經右文稽古前代所  
無而有宋一朝篆學荒蕪特甚深可慨歎酒後縱筆成  
詩奉柬儉老俟南游時詣六藝堂當獲飽觀快訂也

昔年南北隨計吏訪古尋碑劇閒恣祥符陳留兩縣學諦觀二  
體石經字當時單車急馳走羶蠟無緣自攜致數紙雖從帖賈  
收末由手拓窮精緻三十年來成老夢百事荒涼從棄置今朝  
忽枉故人子翠墨持示而翁寄三百七十有餘幅得自淮安破  
書肆易書詩禮春秋經附庸孟子七經萃溯惟宣聖定六經古  
文特秉周公制中興籀史屏不錄魯國儒書賴弗墜臣斯敢以  
秦革周倉雅茫茫委荒翳慘到焚書萬古無三代斯文眞墜地  
桃源俎豆無處問孔壁金絲定餘幾何怪中郎校石經止寫八

分不求備先時浚長正六書博采通人理羣類上通古籀成大

宗李相秦文多割棄

秦刻石多與許書不合知叔重黃初三體

果嗜奇本邯鄲純及衛覬惜哉入石止兩經舛舛科文相雜廁

三體石經止有尙書春秋其古文特徵依科斗形造出五胡擾擾紛謬體有唐巍巍握神器

昭陵繭紙寶俗書開成石壁剡同異雖然事有本末歧要知俱

遠篆分意後蜀刊石兼傳注翔實一更前代例莫歎閏位孟知

祥賢哉僕射毋昭裔右文崛起宋雍熙應時果有徐常侍遠從

祭酒續遺緒特斥陽冰出新義傳及仁廟崇正學首重篆文真

楷配七經朗朗列膠庠二體森森標職志無如講義忽鬱興坐

使奇文墮幽閔歐蘇文筆騁雄駿周程學術真淵粹不聞論據

到石經神物嗟從何處避許氏遺書幸已傳徐家繫傳孤行世

茲經寥闕少人窺豈待渡江落胡騎打本都如鳳羽稀貞珉那

免牛角礪先生微尙在高密焯掌鏤心擘六藝精誠所感經有  
神祕奧來逢天所賜零瓊碎璧不冝舍緘付賢郎勤誨示賢郎  
懃懃敬父執手編來破暖翁醉暖翁經畚久不鋤粗識螭扁迷  
次第舊學溫尋四十年靈光想象三千歲四目靈光  
見倉頡碑其箕云雲  
與於烏即此册中篆書其作  
烏古气可掬觸手掀掌古芬膩頗望時髦  
略識字休競詞華忘典記幾時去泊淮浦舟與君細剪寒鐙穗  
金石重搜錢阮遺觚彝遠索商周邃江上烽烟當漸息中天日  
月還重麗古篆不毀聖不死禮樂可興經可繼莫驚此語迂且  
夸請讀山陽丁氏新裝巨册四

十一日走訪牛仲遠新居適主人它出次日見示小小斜

川八詠次韻奉和

應門知是故人家幾曲通幽徑不斜信手推窗鷗鷺起夕陽如

雪滿蘆花

沿湖絕少野人廬，比似江鄉景不如。難得新居生面出，也教婦

子識樵漁。

大明湖左右絕無好屋舍予嘗以爲怪今得小小斜川當有繼起者矣

我尙風塵苦縛纏，何時歸泛五湖天。幾間茅屋能臨水，不羨平

泉及輞川。

次韻答祁壽陽相國三首

故鄉南望尙無家，塵海還容破帽斜。灤社春添榆柳蔭，明湖秋

老荻蘆花吾廬乍到餘餐菊。

五弟自上年移南半節胡同新居

古寺清游費煮

茶兩載銷磨文字債，肝腸非復舊槎枒。

相公輦下託浮家，世上浮雲任整斜。賸有高情延白屋，何曾晚

節負黃花。秋心暫寄茅柴酒，冬味全歸雪水茶。指日飛箋滿畿

甸，西山掩盡樹槎枒。

來詩望雪

井西喬木是公家美蔭街連上下斜書律晚嫌新柳脚來詩有

抱元和脚句詩懷寒對古梅花續編諷詠如嘗蔗見後集雋味咀

含勝品茶乍覺杜顏真氣合破牆題句出槎枒日前詩論杜顏合一之旨

張詩船留飲

前年秋別老船家重蹋怡園石徑斜拚與一旬三度醉蕭然兩

叟萬枝花嘯吟乍復聯鰲鶴君曾屬鶴在色德從容論墨茶夢

到西谿深雪裏老梅香破玉槎枒

縵訖法華連日與老鰲唱和靜夜感懷次前韻

鳳城寒月萬人家三叟幽吟點筆斜雪後商量無限味春前多

少未開花偶緣破悶還邀笛卻為妨眠欲止茶時事方殷朝報

積夜鐙紅照氣槎枒

成皋

成皋汜水西百里皆土嶺線路如修蛇屈曲不可騁咄哉古戰場何苦尋絕境一車塞其隘萬馬難迴頸我行值夷庚冬初氣荒冷五里不逢樹十里不見井傳聞癸丑年粵逆來何猛北行遂渡河燕晉同時警豕突犯畿南狼奔蹙東省蟻聚馮官屯水攻克亦幸豈無山河阻所向莫之梗守國在設險人謀乃要領賊至兵民逃何殊自捐請河山雖壯麗天開圖畫景土如能化石虎牢卽劍閣石如能化土岷峩卽鞏洛石性秉剛厲亦自相附著土性雖柔黏依然時鋒鏑中州本臍腹鎮靜藏筋絡骨少膚肉多乃受萬氣託莫羨長江清休嗤大河濁因其土石性於焉分厚薄

嵩洛

觀水不至洛觀山不至嵩周流三萬里飄泊等萍蓬我初見洛

水蓋自鞏縣東行入偃師河洛斯會同心胸大怡悅耳目忽  
昭融因悟皇古初天心共明聰游河與巡洛輒與帝謂通皇戲  
畫卦理神禹治水功圖書實闡示易範開冥濛嵩峙洛河閒允  
爲天地中茫茫羲禹後制作來姬公測景先陽城朝夕正攷工  
規度百里內乃營城廟宮成王受圖卜垂拱沖人沖太保非不  
聖承命位自攻公成文武德豈忘鎬與豐茲事蓋懸絕一埽口  
耳空卜年將九百周祚得再隆封國指奎婁定道育聖躬河圖  
雖不出鳳亦不棲桐聞知嗣先聖萬古開愚聾溯惟皇羲來放  
勳及重瞳發祥地相望闕里連蔥蔥海岱與嵩洛其氣相始終  
至孔乃盡洩巍蕩天比崇我由岱至嵩千里馳如虹獲覩泱泱  
洛迴憶洋洋風斯游信奇絕神志爲之充吁嗟今世事周孔道  
欲窮將使禮樂區化爲夷與狘瘡痍滿宙合悔禍望蒼穹私憂

一懷古莛寸叩鐘洪

游嵩

日照測景臺雲暗太室山月明少林寺雪擁轅轅關陰晴與寒暑氣候有萬班是爲大地中鑪鞴無時閒遂憑一山氣鑄此大宇圍東西南北馳至戎夷狄蠻推求端緒處正在百里閒嵩少旣蟠結穎洧復彎環中間小谿澗數步聞潺湲天中卽地中二氣自往還卻登峻極處亦復易躋攀不似他嶺岫險絕藏幽艱怡然若有悟我身失靈頑

出轅轅作

看月嵩嶽頂千里白如雪少林雪夜宿萬山皎如月莊田不知處尙峙唐兩碣面壁事有無石影照毛髮五更塔鈴語飛出一林鶻驚落瓊瑤花客夢醒勃窣凌晨越轅轅石盤亂凹凸三東



復三西環轉不可歇迴思雪月景何忍成驟別

登洛陽城樓

曠二千年王氣收霜晨閱徧古城樓伽藍記與名園記賸有伊  
川東北流

安陸夜泊黃虎卿餽筍酒與弟姪酌

新麪斤才十二錢荒城尙幸有豐年深冬喜見頭番筍初雪剛  
多上水鯿骨肉睽違天與聚江湖平靜月初圓傳聞軍報難憑  
信暫撥愁煩取醉眠

胡詠芝由英山移營太湖書來相迓留別汪梅邨丁果臣

大開書局在鈴轅

桂時開書局於撫署多  
軒輯刻讀史兵略

賢士翩然共討論汲古

有源經緯出愛才無底性情尊華星春引太湖路積雪夜明多

桂軒樽酒句留兩儒宿諷稽地志與天元

梅村講地理  
果臣談算法

十二月廿五日立春太湖留別詠芝君久抱病蓋誤服溫

劑余小住三日不令服藥眠食談飲乃俱健勝

營門大開不須款主人遲客欲忘盥十餘年別果精進劉盡才  
華歸樸坦羣才延訪日躬躬宦味澹餘能侃侃兼資文武根道  
力舉世同聲歎微管雪夜聯床語微至病驅卻藥意怡衍君言  
時弊苦末疾醫者宜求和與緩將才日出循吏希軍務方長民  
事短務敦悃懃蘇瘡痍未宜馳驟矜威斷殺賊容易固圍難此  
意有誰窺奧窾我言君疾正同此貴以優游平剽悍一身肩任  
軍國重萬士歸依肝膽滿精神惟仗自存固箴石豈容偏峻煥  
且遲歸計向湘水暫可新春同酒盃忍將別淚彈向君媿我江  
湖恣閒散

除日到黃州雪堂寄懷詠芝

逢迎到處想驂駢  
慚媿清狂老布衣  
官事已因封篆簡  
輿夫况爲過年稀  
半生游思如雲卷  
千里鄉心並雁飛  
坡老有靈應一

笑芒屨帶滿雪泥肥  
來往俱供詠芝  
令牧令供詠芝

東坡再見黃州閨  
作賦題詩滿雪堂  
何必千秋論興廢  
祇今十

載有滄桑  
雪堂毀於賊重葺  
江山不逐浮雲改  
豪傑爭隨去浪

忙待子功成早歸  
隱樵兄漁弟共鷗鄉

### 獨游

獨游休怪性情偏  
藉草眠雲意適然  
既免兒孫多細碎  
又無賓從苦留連  
寺藏複徑須探奧  
嶺有千盤必造顛  
今日雪堂成小憩  
江山滿眼入新年

楊性農寄示近詩有夙不喜金石一篇中有欲罰杜舉志

吾過之句蓋自知不足者因用原韻奉答冀勉進此道

也

太初有文蓋無字僅類畫卦分陰陽珠玉爲珪璋璧琮厥貢集  
瑤琨琳琅金石刻畫乃漸起文字孳乳不可量稽古同天炳羣  
聖鉤河摘洛歸素王當時六經雖手定傳道難徧諸狷狂曾商  
卜漆數子耳抱經講授各異鄉漆書竹簡虞俄空藏壁過江多  
悚惶聖人如列五等爵胙土得分青赤黃定取吉金與樂石古  
文刻經天府藏能令羸燄永消戢更軼禹鼎騰芬芳豈比河圖  
與大訓簡重止宜陳序房巍巍之德竟無位禮殿俎豆長馨香  
俗書寫經大容易直似衣食憑農桑聞疑孰叩渡河豕糾誤難  
窮白下羊或挾訛文騁肱見敢訾古誼甘面牆傳言遺經在海  
東有類佛典淪烏菴吁嗟聖道久凌替三古舊聞誰辨章布帛  
菽粟化銀幣井田封建如收皇金石一線幸未泯大比竹黍意

法長歐趙洪薛功豈小非僅饋貧餘古糧爲文詞宜略識字退  
之斯語頗審詳吾子於韓有微尙視它作者皆秕糠宜繹聖言  
滂初訓周前秦後別界疆旣知杜舉當志過豈可信筆爲橫翔  
近者粵東及鄂渚夷艘羣竄如奔狼寇氛四路伏且懾彗孛三  
旬戢厥光沅湘水潦亦斂縮計子來過秋當涼相與從容究倉  
雅六書大義如莊康

輓胡詠芝宮保客臘在太湖大營小住三日深談造微君

爲悽感

書生白面早登臺正大光明萬障開才看紅旂安慶出驚聞素  
旄武昌來憤因樓櫓遲杭葦感到軍民痛觸槐回想深談三日  
夜千秋學術太湖杯

春江

幾處漁村欸乃歌輕煙染就萬峯螺烏篷搖入瀟湘路纔信春  
江是綠波

畫山

世人愛山不識畫可信天工難假借世人見畫不識山墨采筆  
痕誰脫化扁舟看山入陽朔兩岸巉巉天易夜風沈雨晦鏡不  
明萬影圍船森可怕清晨雨止風亦靜日光萬道箭鋒射石壁  
百丈高入雲果似天然畫圖向空挂渾含光采金碧現透露形  
神虹月跨烏乎此畫我曾見似入武梁石室朱鮪舍又思上溯  
三千載禹鼎圖形或其亞仰觀久之目爲眩陰晴倏詭變更乍  
止愁世有愚公山可移謬云畫妙通神任譌罵何如縮作小硯  
屏傍我幽齋琴几墨牀與花架

錦屏

萬岫雨餘出奇哉雙錦屏鑿開天竅突規就月神形肉好露環  
壁髻鬢爭尹邢好游知幾輩誰暇此題銘

逆風

寒雨連江又逆風舟人怪我屢開篷老夫不爲青山色何事欲  
斜白浪中

題蓬樵癸丑畫冊信筆疾書有懷海琴

蓬心先生作郡時先公實受國士知平生於畫不甚嗜但得師  
迹如侍師我初看畫特此嗜先公每笑吾兒癡兒今老矣癖更  
甚謂筆外韻公專之永州山水天下獨一樹一石多餘姿十年  
不調老於郡是官是畫深相資元銘柳記千載後公乃繼以無  
聲詩官公之官畫公畫楊子海琴遇甚奇愛山愛客游必共日  
日畫裏並逐追我生是邦游頗習又從楊子窺未窺山川靈祕

討愈出不妨少得仍多遺烏乎公畫書味足文沈憚王非等夷

吾家仲子抱神慧於公得髓形能離與我孿生愴先逝忽覩一

幅心酸悲攜持不待主人至楊子感歎生悽其於余得子穀處吾

孫鍾曾幼解畫課餘塗抹聽所爲我出看山五十日後至桂林

先九疑歸來爲汝道其概或染數紙解我頤從來書畫貴士氣

經史內蘊外乃滋若非拄腹有萬卷求脫匠氣焉能辭是册七

十四歲癸丑作休官鄂渚方栖遲昔年我主灤源社陳子晉卿

能我詒合之卯已兩巨册題曰三癸如鼎彝舊藏蓬樵癸巳癸卯兩畫册得此遂

成三壬戌穀雨前兩日展册萬感紛相隨石灣避風值大雨破

筆題字何淋漓錯雜顛倒如雨點非詩非記從人嗤莫云畫事

止一技造化性靈俱集茲何時得令楊子見相與賞奇析奧傾

千卮



行笥

一笠山煙兩屐泥更開行笥有何攜使車愧未周天下游記今才補粵西銅鼓知非諸葛舊石華止有宋賢題奇巖祕洞紛難

拾略有詩囊付小奚

足迹未至者今止雲南甘肅矣姚論孫贈銅鼓買得桂林宋題名多種

山谷浯溪碑詩以譽爲毀然則中興頌三字何解非元顏

兩公忠愛意也研生和余詩曲徇山谷復草此以砭之

古來大筆輝山溪文章在集字在碑就文論文字論字未宜牽引同棼絲況古名臣氣磊落豈有瘦語如嬾兒元顏碑照湘東西惡禽孽獸不敢栖雙井老人堅苦學於詩與字無苟爲顧獨未解魯國筆貞白懷素乃所師欬斜謂得古人勢醉帖終讓坡公揮其於斯文更苛議中興二字非陸危宗廟再安次山頌日月雙懸太白詩趣取大物是何語點汗高文成謗詞摩崖大字

況如斗魯公忠愛豈肯隨梅根效尤雖小誤被古人愚吾所悲

清狂束研生

兩京嚴重有經師六季清狂我竊疑真可絕交何必論既能招  
隱不煩詩溫柔敦厚先王澤慷慨蒼涼烈士詞秋色更隨人境

遠古情贏得是相思

研生將移居  
荷池精舍

耒陽謁杜工部祠

我從夔府尋茅屋又向成都叩草堂孤塔長安曾望雪古亭歷  
下屢飛觴沅湘歸夢生懷抱屈賈餘風未渺茫今夜孤鐙千載  
思一江風月弔詩王

韓瀧祠

舟泊韓公祠瀧神卽公位舟人競傳說公實職所事苟非祈禱  
虔難卜涉川利試思公未來神柄何所寄如何公既來瀧險每

近代詩鈔

何紹基

三十七

難避罵佛佛無語驅鱷鱷識字神乎應有神於人當默庇請讀  
南行詩訶責任灑吏斯吏竟何人耐祀庶無媿

題羅兩峰畫鬼趣圖戲呈德畚

德翁篤耆古圖史紛在架牛腰忽成束送看不煩借兩峯鬼趣  
圖開卷天色詐奇想構虛無陰風交醜姦說鬼古籍多兒童供  
喜怕無端賞其趣鬼氣從此霸乾嘉諸老宿題詩不留罅豈知  
鬼情性喜諛而拒罵坐令題詩人袞袞歸長夜請君亟焚此形  
神失憑藉鬼亦自有國各使反其舍界斷人鬼關清氣調元化

黃月厓有賞菊詩次韻奉和

吾廬不知處何暇有東籬恰喜鄰園近時窺露葉垂重陽况未  
到菊事不嫌遲領略秋來味涼風事事宜

廿六日唐藝農招飲賞菊同坐有彭于蕃李仲雲于蕃有

詩次韻奉答

已送殘秋去今宵住雨聲名花逾昔豔傑閣喜新成韻逸難爲  
畫枝多不識名素心三兩客珍重主人情

黃海華見二十八日卽事詩惠貺新篇次韻奉答

自從手種庭前竹有客到門都不俗主人譽竹客和之一笑相  
看清興足兼旬得雨四五番漸脫枯黃長新綠藤牀鎖日竹陰  
坐口不欲言心暗祝平生笠屐遍山海老去丹鉛閉書塾豈能  
遽脫猿鹿性未免迴思雲水躅忽然叢篠森自舞遂覺遙峯到  
何速一林疏影夜吟多五嶽前游清夢續奇懷跌宕祇自喻歲  
華閱歷眞可讀東南重寄得韓范吳越餘氛走蠻觸時杭嘉蘇  
常俱克復  
而敗賊逼擾安得天公雨露甘淨洗十年兵火毒五月十三壬  
江四地面

寒佳會餘四老簪盍翩然來五六

冬春閒與王敬文黃海華胡

舒藤雲往左景後頗覺岑寂而近日蔡流叟鄧厚甫絕居然叻鹿有鳴

和不似飛蚊莽徵逐明朝又向竹間聚曠寄園中青菜熟處恕園

勝疏最

今宵且和瓮叟詩皓月一天爛如玉

病起奉謝王敬一丈

穉孫生日翁一樂抱向竹間恣歡躍有客馳饋大鱗魚帶鱗透  
蒸供飽嚼何緣觸迂到藏神雋味不受翻成噴夜來腹痛迸將  
裂號呻達旦驚四鄰牽連反覆及肝胃傾吐宿酒數十斤多藏  
厚亡理應爾不解別腸所貯何輪困疾雷下天雨破屋電光時  
欲穿吾腹狂霖不能斫我痛且活庭前新種竹素心落落三五  
叟猥辱過存情話厚昨宵幾與諸公別此後相期同白首諸城  
丈人活國醫連日風雨勞奔馳今晨請緩疏引子和我戒食鱗

魚詩

金陵雜述四十絕句 錄四

瓦礫叢中仄徑攢芒鞋半日已摧殘心憐廢井頽垣裏多少陳

人骨未寒 四圍風塵最甚

向帥遲回孝陵衛曾公徑逼雨花臺從知膽略殊高下坐看堅

城力戰開 沅中丞直逼雨花臺人危之卒成大功豈不偉哉

偽府俄成攷古廬躬躬耆碩共稽居謂宜刊罷船山集徧梓人

間有用書 偽幕王府今為書局現刻王船山遺書歐陽小翠楊見山湯衣谷李寅叔張嘯山陳卓人皆在局中

烟水荒寒不可收昔年曾作冶春遊湖山自有佳時節兒女寬

心且莫愁 最後至莫愁湖止一片水耳

揚州萬佛樓

二十四橋無水流一城荒艸總如秋將軍百戰功成後寶相先

近代詩鈔

何紹基

三十九

裝萬佛樓將軍詹姓

自澣墅關至虎邱

荒涼澣墅已無關孤塔遙明古水灣虎阜千年歌管地悽然化

作髑髏山虎邱堆闕成  
山尙未掩埋

次韻和黃南坡新開蔬圃時爲題寒畦兩大字

行徧江津與海涯歸來懶復向人誇賃廬喜種緣階竹隔巷貪  
看別院花游倦自憐饒得老心安真覺易爲家去年今日吳淞

路正狀天輪賦木華兩吳淞口觀輪船出

歲寒諸友各天涯忽萃耆英盛會誇縱酒氣浮空際月敲詩雪  
湧筆頭花古來良史誰完壁海內名篇幾作家惟有東鄰宛園  
叟不隨壇坫競才華去冬與黃華胡恕堂曹穎生李次青楊  
性農羅研生彭于蕃張東墅諸君爲消寒

會論史評文詩事  
頗盛惟君辭不至

邀我題楊照水涯寒畦兩字不矜誇待傾除歲凍醅酒來看破  
春油菜花鴻爪不辭千百印雞飛嫌隔五三家且欣各有含飴  
樂笑聽兒孫誦白華

樹石亭臺都有涯平泉綠野亦徒誇且尋幾畝鋤荒地多種無  
名野艸花春煥蜨蜂有先覺水寬鷗鷺共浮家回頭四十年來  
事二老差堪話歲華

論交四十年眼  
中朋舊未有蚤  
於君者

### 無園種菜

一年無日不開樽忽作商量到菜根良友過從休索酒請先看  
我好無園

園林容易長巴蕉滿擔攜回自小橋誰想連旬逢好雨蕉心難  
展菜秧驕

菜秧挑自兩鄉來都是吾家隔歲胎難得胡黃兩甕叟名園分

近代詩鈔

何紹基

四十



惠好根菱

東鄉三弟處北鄉二弟處  
並恕堂南坡俱分榮映來

正是城南起課時老翁懷抱有春知添來半月閒忙味補竹栽

花並鑿池

池心種藕不多時已有亭亭出水枝不羨鄰家看花早但能花

好不嫌遲

南坡處荷  
花已開

矮作欵篷半整斜似籬笆不似籬笆清晨露水滋涵後又是一

層瓜豆花

街頭買菜亦尋常種向家園特地香恰好苦瓜紅莧菜端陽先

供祖先堂

閉門種菜得閒閒僦屋何嫌近市闌題作無園園已有吾園正

在有無閒

歲寒雙鵲久相依節過清明何處歸今日好風涼雨後翩然念

舊繞梁飛

五更風露有精神  
浩蕩天恩處處勻  
菜色青蔥真可愛  
如何比擬到飢民

可笑多年肉食人  
老來風味土膏真  
手鋤隙地無三丈  
如見農家萬井春

青氈而外有長鑱  
迴首濂谿與月巖  
縱有珍肴供滿眼  
每餐未許缺酸鹹

道州醃菜名酸鹹余每餐必需此下咽

幾番猛雨挾橫風  
欲捲蓬廬上太空  
前後中間三院竹  
一齊笑舞向蟻翁

卻埽剛嫌剝啄頻  
迴車未怕達官嗔  
要將寂寞蕭閒意  
容受崑崎歷落人

向來門無留賓今漸懶矣

竟日沈酣書卷中  
呼杯剛對夜鐙紅  
醉餘一枕貪眠好  
莫誤明

近代詩鈔

何紹基

四十一

朝起早功日酌不必以夜無

夜夜不離車與舟，夢中勤補醒時游。好乘健臂如雙翅，快與翺

翔徧九州夜必夢出遊又時常夢飛

添植新篁密，更清毳毳穉。柳綠陰成靜，中已到山深處。試聽鈎

轉野鳥聲

上虞王子振奇人，枉過無園索寫真。正是嶽雲攜滿袖，筆端靈

氣與傳神王蘭峯詰為作無園種菜圖

羅研生出示陶文毅題麓山寺碑詩，用義山韓碑韻屬余

繼作

文毅所藏二本，一為陳恪勤公故物，一為太翁莫江先

生手拓。文毅有覆刻本，頗多錯誤，殆鈎勒者失真耳。研

生攷訂是碑，甚勤徧尋各家拓本，以吾所收兩本為最

古頻辱借閱今始見還也時丙寅四月下澣

學書重骨不重姿早窺古意薄獻養初唐楔叙妄貪取千載筆  
勢歸陵夷明皇手挽乃天縱岱銘氣壓千熊罷石臺孝經亦沈  
厚不沿祖法爲指麾山陰科白得埽盪菰海頽波憑主持顏公  
李公應時出書壇並樹大將旗魯國書名蓋天壤後來趨步難  
肩隨北海法門又一變香象渡河吞虎貌無如風尙喜妍媚動  
以豪快相警訾又云兩公踵王法肫造傳訣編支辭神骨自有  
本色在生氣豈傍它人爲森立碑版共照世相互矜賞同解頤  
梅根久抱麓碑臥古拓新本鋪淋漓昨過古荷池舍話見示印  
心石屋詩所據滄洲舊珍冊副以楹鑿輝家墀覆刻雖多襲前  
謬雋句自足張此碑若非多本細參斟忍令蛇蚓淆蛟螭吾收  
宋墨竟得耦天畀古福疑有私兩公遺刻世不少半世搜度勤

裝治浯谿大字曾手拓至今雪氣寒心脾手冒雪谷山巨石碑麓山

用山谷屢摩誦兼及記贊碑陰詞吾鄉歐褚炳初造復來顏李光

重熙真行步武傑自樹篆分模矩迫可追如何宋後染閣派鼎

潭摹勒紛癡抵典型巍然時湘潁願執筆者慎始基

次韻答黃岐農道讓水部

岐農且字願為民水部頭銜况絕塵獨自抗懷期尚友不嫌低

首閱時人天涯浪迹無狂態蚤歲辭官有性真聞道碧紗籠處

徧埽除牙慧得清新

一投簪紱即齊民各抱詩懷且混塵久闊願言心愛我誤生斯

世語驚人見贈有誤生斯由它偽體能千變欲證名山貴一真

何日論文樽酒共眼中花事幾番新去冬消寒小集

荷花生日荷池精舍作同周韓臣閣學周幼盒太守吳稱

三廣文主人則羅研生舍人也又字梅根屺士

荷花何必有生日荷花生日何必詩梅根屺士巧追暑藉良辰  
爲譚宴期連宵快雨遘新霽繞徑密竹搖涼颺荷花幾生脩到  
此高齋介雅趣特奇長沙城中古荷池傳是宋元規阨遺乾嘉  
以前盛文宴樓館圯盡餘荒陂幽藥年年自開謝野鳥拍拍來  
覘窺忽營精舍我題榜謂將於此開經帷衆議差池講肆寢我  
爲構度園亭基三湘義勇果冠世五忠傑立允建祠重廊大廈  
地嚴祕衷忠攷獻事接隨梅根秉筆不及讓淵識毅力誰敢疵  
高霞萬柄照硯几墨版百函森鼎彝

夔忠錄已成編沅湘文徵  
方刻皆研翁主其事

勝賞凌晨興不淺衆賓笑我來何遲爲君數典自國風鄭陳斷  
章資解頤姬公爾雅訓詁祖顧於荷不惜費詞後來汶長辨文  
字蓮茄莖蕩分毫釐翔實鄭重荷品貴彼梅菊蘭皆後之吾鄉

濂谿大儒出愛蓮說許君子姿芳臭真於道味合綺豔官效才  
人嬉荷花生日出何典韻事不勞勤度咨羣芳興廢古今異萬  
事變化煙雲馳梅根覽揆隔旬至菰蒲深處明綠漪綠漪綺舍  
君書齋額  
新秋風露浩無際容我花前兀傲傾千卮

梅根尻士初度日卽事作

前日往觀荷之華略拾倉雅供搜爬荷名芙渠其莖茄的蕙薔

蕩菌蒼蕙讚爲麗艸波映赧伯陽餐之壽久遐郭氏讚云芙蓉  
麗艸一曰澤芝

泛葉雲布映波網熙 伯陽是食饗比靈期不自壽昌其葩我詩突出淬鏤鄒羣彥

繼聲相晤呀譚其淨植脩且姱祝荷期頤不可涯大晴十日暑

更加城頭五夜鳴秋笳時新募 催出天上紅日車凌晨早起展

碧紗喜聞打穀喧連枷走尋精舍荷池窪梅根尻士肇錫嘉六

十四齡猶童娃月前快泛天河槎翩然兩仙筠與霞與郭籍仙同

庭泛洞

同浮浩渺窮豁舒噉呂仙棗君山茶道根彌壯堅萌芽暖

叟瓜邕等鹿麀五年以長髮鬢髮三十餘載水母蝦切直劬

忘蓬麻登堂介雅缺鳧鯨濂谿土物攜些些二客從我儕棊芭

太守初歸自三巴

周幼

廣文泐潭習趺跏

吳稱

看我酒後揮龍

蛇猝不可識蝌與蝸倏忽峻坂馳騶驂無可羈勒墜厥鞞擲筆

一笑誰敢誇池邊古梅微歎嗟百年鐵幹千杈桺年年獨先衆

卉花春風不恃羯鼓搥元氣遙遙接羲媧豈宜曠無生日耶願

附尻士爲隨駟尻士沈吟手百叉同梅生日何疵瑕荷先梅後

理則差請俟中榆管測葭黃鍾九德調笙琶慶梅初度取義奢

羣芳聽命無紛拏眼前夏木千章遮想到枯林寒萬鴉雪花如

席整復斜暗香攢破柴籬笆咀嚼冰蕤鏘齒牙炎歎脫去如落

痂吁嗟名利衆士宜豪門弧辰開燾衙蠅營蟻附堆纓緇錦障

近代詩鈔

何紹基

四十四



金杯鬪紛譁何似野飲尊杯汗花前一醉差可夸荷耶梅耶宛  
一家臭味定正不頗衰皆於尻士有葛瓜介荷餘韻堪擗塗雷  
聲兢兢風颼颼欲雨不雨乃雨沙鵲憚填橋聲楂楂微禽避役  
如憎斂天孫婉婉雙髻了萬年乞巧盛笄珈或有餘巧容我賒

幸為砭劓詩癥瘕何人剝啄門嘔啞又訂後約笑口哆尻士書來云稍

涼選想請客荷池宜有小艇划好隨鷗鷺嬉魚蛙先呈短詠非揄擲

題吳稱三德襄所藏大興徐氏尺牘册即送之赴城步廣

文任

星伯徐丈人名重天祿閣泊為絕塞行專究輿地學李申書文張

石洲及魏深默沈敦子同時攷疆索爭斟元廣輪西域及朔漠誰期事

機伏漸見中華弱疇人立傳後徐君青羅茗香陳東之遞作今日同文

館蚤已開橐籥當時譚藝歡我皆聞其略觥觥盛名儒冉冉歸

夜壑大息撫遺牋時艱竟安託

醴陵吳稱三澹靜不模稜春明恣游目古匱歸行舡卽此尺牘  
舊姓名近可徵非吾丈人行卽其同志朋皆具淵雅才或以經  
濟稱簡札有奇致未點塵市蠅殊勝佳想帖通侯費楮繪一官  
入窮僻千里勞寢興過從接琴樽臭味無淄澠贈言願益勉古  
義勤服膺

南昌憶沈幼丹中丞

補錄乙丑年作

憶昔雍容職文史日日過從相勵氏我持蜀節君外擢官聲清  
過江西水母病陳情恩慰留銜悲已上建河舟入門一慟竟失  
恃予假營葬襄勸優堅請終喪遂不出中外同聲如有失我來  
南昌不得面山影江光盡蕭瑟無論市賈與村民處處謳思沈  
大人以人事君使者職居然門下得名臣

近代詩鈔

何紹基

四十五

次韻答黃海華太守時守永順

丁卯

友朋離合風搏沙平生四海爲一家東南歸來老隨至高齋寂  
坐如枯鴉賴有同心二三叟時與灌溉詩萌芽近來病後稍健  
復又苦呢酒兼貪茶羨君作郡得舊治十年重賞寒城花竹馬  
兒童好快活杖鳩父老重歎嗟蠻山惡箒亦變化接天秀氣雲  
難遮湘中秋冬苦久旱雖有雪意無由葩新年雷雪補寒令天  
公晚蓋意自嘉時入仲春忽驟煥花事似比昔有加牀頭百甕  
倒不盡沾春愛向街頭賒花朝况有月一鑑屐聲不辨路幾叉  
古柳千絲已搖曳奇石雙峙爭含呀昔年彭叟醉客處詩情酒  
氣留餘霞今宵泥飲苦相憶飛寄于蕃同海華海翁詩來今始

報醉墨字字風吹斜

花朝借起堂隆  
雲飲於怡園

黃南坡屬題唐陶山先生書山谷詩幅 己巳

儻有江船吾欲東我懷今復似涪翁笑翁夢繞石牛洞不入名

賢五百中山谷來往舒揚間未至吳郡故不與五百名賢圖像

儒雅便宜不競絀陶山循譽嗣滄洲遺文訪徧桃花鵑何礙詩

人吏事優陶山先生刻六也

焚硯拋詩乍越年強邀題句向前賢迴思捧手從摩頂遺墨飄

零打稻篇嘉慶甲戌余得見先生為先公書打稻調小冊今已失去

當時弱冠與成童老健相看面頰紅六十年前蒼舊事談芬如

### 雨落杯中

丁雨中丞贈花手札謂花氣甚偉詩以奉謝庚午

暖翁一病經五年見花不樂知無緣迴思少壯花下顛不圖頹

茶如枯禪早春忽繫吳門船金獅巷頭賃一椽堆石薙艸且伏

跽中丞主人當代賢除貪懲惰懇荒田求治頗急朝寄專譏訶

沓集志願堅亂餘方規元氣旋遲懦敢望沈痾痊厭斥紈綺輟  
管絃五簋宴客無加籩翼挽頽俗如障川官衙隙地畦蔬鮮藉  
課晴雨知胝胼奇疆曲列甕眼編雜植花卉自蔓延退食嘯詠  
資留連兼奉慈顏髮不宣庶免土思魂夢牽培灌能移造化權  
根株傑茂苞萼圓酬恩戴澤不忘愆見吾老病心憂煎長鬚遣  
送相蟬聯幽蘭鼠姑與杜鵑香風有鄰來比肩飛騰綺麗羅衆  
仙如荼如火光燭天色香殊異無襲沿直似一氣爲陶甄花氣  
甚偉無佞便非公安得此妙詮我方葺屋補漏穿奇書古畫四  
壁懸花知得所氣更全不復迴戀高衙前引觴相對塵念捐我  
爲魄動神蹁躑世人愛花惟賞妍作兒女語嬌可憐我詩差喜  
不拘纏花氣酒力蓬蓬然主人儻許相磨鐫

聞徐壽衡學使陪李若農主司江上觀潮喜成十二絕句

時十月初三夜 錄二

蓬萊閣下使車停溟渤狂瀾伏枕聽淞湖山清滿眼潮聲不

到定香亭

先公督學山東浙江余皆隨侍壽衛亦連視學兩省又昔視學福建亦先公及余先後典試地壽衛昔典

蜀試余旋視蜀學蹤迹柏屬洵妙緣也

水性輕柔乍若頑止緣龕楮扞重關兒時爛熟枚生筆到老模

胡骨母山

母十三歲時讀七發問骨母山何解孫鏡塘師曰是胥母之訛又問伍胥之母何據師笑不能答孫師杭州

錢塘孝廉

年頭皖中歲暮吳門皆值雪甚冷秋冬閒浙遊返權復膺

寒疾新年尚未出屋眉生都轉以聚星堂韻索和率成

一篇在浙忽欲習狂艸故有墨顛句近日酒飯肉俱未

能近頗以麥飯療飢耳屋中盆梅三十本乃潘季玉吳

平齋李笙漁趙心銓白香亭所贈并吾兒買自山塘者

歲底爛開不羨諸老衝寒鄧尉木瀆閒也

辛未

年頭歲尾舟一葉江北江南看春雪我舟自行元氣中山水奔騰無斷絕定香亭畔醉百場橋李城邊波萬折自嫌詩瘦覺才盡且習墨顛虞頂滅酒杯伴我幾十載忍令久要中道掣迎年苦怕衾潑水把卷仍愁眼生纈江南秔稻况失味莧腹祇宜容麥屑肺腑無言自更變煙雲萬態彌颺瞥小屋梅花三十本請客自斟吾嬾說眉翁忽欲辨酸鹹笑起和詩擊如鐵

題費廉卿太史畫卷雲樵同年屬作時辛未穀雨節後同人多游湖去而老病不得出可笑可笑

烽火銷餘喜再生依然萬頃水雲清鱸魚蓴菜年年長誰識江東老步兵

鷺舍鷗香浩渺天三篙兩槳小遊仙此船一去休回首沮溺何

曾姓字傳

栽花補竹繞吾籬快雨剛逢穀雨期我比散人還要散孀將漁

具問天隨

雨未止  
復占此

補竹

略刪階蘚埽庭莎三徑欣增好友過直節虛心瀟灑韻不曾嫌  
少豈嫌多

老成猶見典型存後起英材盡不羣比耦莫訾新聞舊同心努  
力上青雲

噴汝刪除近下枝倚闌自笑我真癡疏疏密密天然意豈許畦  
丁井婦知

題襟館消夏第一集用劉芙初前輩讀刊上題襟集遙寄

賓谷先生韻

近代詩鈔

何紹基

四十八



海疆淮甸占風流運值紅羊一炬休燹後全荒西楚迹我來重  
認古揚州最憐花月如人瘦不待風霜滿眼秋賴有通家儒雅  
舊題襟館畔許優遊

高齋寂坐看簾波不覺炎光半月過酷暑枕邊詩思醒今宵衫

上酒痕多是夜將自嫌老醜難圖畫留主小人照幸接諸賢共歡歌

容我疏狂忘杖履官衙瀟灑似巖阿

翩翩笠屐似飈流訪勝探奇意未休五嶽徧登猶有嶽去靈山欲

未九州而外尙多州謂英米羣花圍繞權支夏片雨飛來欲報

秋好待新涼生院落銜杯暢與話前游

迴思舊夢疊層波詩艸叢叢埽葉過老去矜嚴期道勝從前爛

漫笑才多兒孫甚念游蹤憊興會偏酣獨夜歌幾卷東洲鴻爪

印願加礪淬莫依阿諸君均索

東洲詩艸

竹下作

初三手種竹竿十如迓嘉賓自前席初七移榻竹大笑今日主人翻是客酒杯茶具略安置詩幃畫叉生潤澤達官難拒枉高軒韻士相從響游屐仰看十竹自親昵正氣干天可千尺風橫雨快勢飛舞月白庭空意閒僻憧憧往來果何事蹋破蒼苔殊可惜此君高韻我不如藉傍清陰靜心魄

示書局諸君子王治軒李賓虞郭堯卿莊希祖次方夢園都轉用昌黎韻

行年逾古稀未缺口耳眼恃此炳燭光尙可照編簡慨從兵燹後浩劫已盈限老儒迹偶出武士色漸赧行省奉廷議羣籍補鉸板書局英彥萃餐錢耗琴觥偏尙乙部書令我微笑莞從來聖經尊菑畬乃恆產傳注沿周秦未許妄剔揀一經苟精熟六

菽歸毋弗脩途循平夷自可陟巉嶮治絲先理棼優游致綽綰  
諸子百家言醜疵互劓剗經言發洪鐘瑣碎陋剽棧昔聞衛武  
公有郊勵瑟憊時年蓋百歲未敢怠一轡我愛說經士好音來  
睨皖所期集衆流河渭資灞澆

近代詩鈔

徐榮

榮字鐵孫廣東漢軍人道光丙申進士官至福建汀漳  
龍道咸豐五年殉難於安徽黟縣之漁亭有懷古田舍  
詩鈔

石遺室詩話鐵孫詩筆清超句如青草池塘如昨日黃  
梅風雨又今年雲生陸羽煎茶水花繞倪迂載酒船漸  
暖洞雲初釀綠入春林葉尙留丹雙澗下山迎客入片  
雲穿竹送秋來皆不平庸

與伊初泛舟過宿雪庵大通寺寓齋

南風吹菰蒲千里青濛濛森然醒肌骨墮此琉璃中扁舟裊無  
根不辨天西東有如一片雲舒卷當秋空此外了何見煙痕界

青銅遙指煙際來中有避世翁

兼旬積相思煙水渺如許扣門圖一笑意得反無語披衣出古  
寺扶香問芳渚花深岸轉窄水曲途多阻言尋素馨斜忽遇黃  
梅雨瀟瀟儘無礙主人有雞黍

薄雨不成點涼雲渺森森舉頭望青天明月何由尋不謂俯仰  
間已在清江潯我偶見月影月豈知我心我心碧落高月影中  
流深人間竟何世夢氣方沈沈

江光一亭聚露氣三更轉詩禪入心清茶甘上眉淺迴風洗徑  
竹時復冷然善深林何處燈前邨數聲犬夜久百蟲絕對牀語  
清軟道心方此滋歸夢知已免

小池上卽目書感學誠齋禮

牆西小池容兩弓涵以淨淥春溶溶傍人頗笑手掌大亦有日

月星辰風羣魚戢戢此最樂追逐翠影吹殘紅祇疑賦性不得  
飽終日仰食聲噉喁蚌如處女每閉戶蝦似迂儒常鞠躬跛鼈  
蹒跚更可笑阿誰攜汝來泥中怯姦怕寒頸屢縮萬事不理真  
癡聾先生飽飯無一事捫腹自照冰霜容紛然似識警歎響仰  
首欲自明其衷我無川經與巴瑟與汝言語何由通欲爲汝說  
世界廣五湖四海春無窮汝今眼前有樂境若聞此語心應恫  
亦有波臣困涸轍升斗不至憂長終若爲說此汝亦得恐汝自  
滿甘愚蒙不如緘默笑相對竹影淡淡斜陽東

西齋

西齋牆矮得天寬牆角孤雲日往還莫放桃花過牆去妨渠遮  
卻妙高山

西嶺道中

近代詩鈔

徐榮

二

山靜行人不易逢  
山花遮斷草鞵蹤  
溪雲忽上迷歸鳥  
田水常

留養蟄龍西嶺下田數十畝淤不承足人牛無所施力插秧刈

收穀雨近時宜焙茗  
松濤疎處偶聞鐘  
樵歌隱隱相酬答  
知是

元朝玉井峯尹六峯會一堂在玉井

題筍輿

六扇牕櫺都不安  
芙蓉八面四圍看  
亦知風雪侵凌極  
錯過奇

峯再見難

行裝

早御重繇午葛衣  
客途寒煖費支持  
行裝止有行人覺  
閨閣遙

猜那得知

近代詩鈔

鄭珍

珍字子尹晚號柴翁貴州遵義人道光丁酉舉人官荔

波縣學訓導用薦以江蘇知縣補用有巢經巢詩集

石遺室詩話子尹先生以道光乙酉選拔貢及程春海侍郎之門侍郎詔之曰爲學不先識字何以讀三代秦漢之書乃致力於許鄭二家之學已而從侍郎於湖南故其爲詩濡染於侍郎者甚深侍郎詩私淑昌黎雙井在有清詩人幾欲方駕稔石齋天不假年而子尹與道州從而光大之壽陽湘鄉又相先後其間爲道咸以來詩家一變局莫子偲序子尹詩謂盤盤之氣熊熊之光瀏灑頓挫不主故常以視植釀篇牘自張風雅者其貴



賤何如也竊謂子尹歷前人所未歷之境狀人所難狀  
之狀學杜韓而非摹仿杜韓則多讀書故也此可與知  
者道耳

留別程春海先生

我讀先生古體詩蟠虬咆熊生蛟螭我讀先生古文詞商敦夏  
卣周尊彝其中涵納非涔蹄若涉大水無津涯搗爛經子作醢  
斮一串貫自軒與羲下訖宋元靡參差當厥興酣落筆時峭者  
拗者曠者馳宏肆而奧者相隨譬鐵勃盧鐵蒺藜戛摩搗擦爭  
撐持不襲舊壘殘旄麾中軍持創爲魚麗此道不振知何時遂  
爾疲茶及今茲學語小兒強喔咿雕章繪句何卑卑雞林盲賈  
爲所欺傳觀過市羣夥頤厚顏亦自居不疑閒有大黠奮厥衰  
鼎未及扛臏已危其腹不果則力羸其氣不盛則聲雌固宜宛

轉呻念尸非病夸毗卽戚施黃鍾一振立起痿偉哉夫子文章  
醫當今山斗非公誰種我門牆籓以籬擁腫卷曲難爲枝絡之  
荆南驅使駢野馬復不受罽羈錫我美字令我睇以鄉先哲尹  
公期無雙叔重公是推道真北學南變夸此豈脆質能攀追敬  
再拜受請力之頭童牙豁或庶幾槐黃催人作叢罷定王城下  
離舟維春風冬雪慣因依出送撫背莫涕揮東流淙淙識所歸  
有質賣田趨洛師

溪上水碓成

貧家一舉動終始靡不難區區水碓耳匝月功始完余豈好多  
事在昔多所艱赤脚老醜婢嬾姍聾且頑遣之事春簸炊或不  
給焉有時得母助乃始足一餐無已作此舉令水爲春人內顧  
無竹木未免乞比鄰稽遲到茲日始已事而竣狹巷清且駛白

石周四垣回外板幹蘇蘇雲子翻傭者相顧喜賀我春百年  
嗟我佃耕此瘠确緣溪千年豐不償苦足得十大盆安能盡確  
力確成殊養閒苦心顧爲此亦覺笑旁觀世事那計盡感慨繫  
斯篇

才兒生去年四月十六少四十日一歲而殤埋之梔岡麓  
木皮五片付山根左袒三號愴暮雲昨朝此刻懷中物回首黃  
泥斗大墳

阿卯晬日作

貧人養兒女其苦安可言計日喜存活及歲能無歡我非無大  
男天不與我玄踰年幸舉汝吾道方艱難萬卷不能炊一錢丐  
人艱汝顧生健食飢啼可勝憐論升買市米歸已亭午閒待飽  
化爲乳乃及供汝餐常恐力難活嗚嚙行周年身中百衲衣五

色花斑斑頭上紅錦帽金錢龍鳳盤涎衣被頸下文抱當胸前  
 吾貧那辦此見汝從母賢俗情重晬日烹羊宰肥豚招要聚三  
 族喜氣令冬溫吾此爲單家力又難羶葷亦復潔蔬食爲兒薦  
 蘋蘩祝畢抱汝拜忍涕爲笑顏我族食遵義八葉當吾身維昔  
 別子公鋒冠劉縱軍播平不與賞屯耕水煙田謀力著新站氣  
 欲無奢安鷹鳩起旁掣郡卒賴以全定國與捍患飲井俱忘源  
 珍七世祖益顯留公吉曲水領人明舊帶兵萬庚子以劉縱部將從平播湖  
 班師被論回衛留部曲領人明舊帶兵萬庚子以劉縱部將從平播湖  
 等處揭子逾崇禎辛巳王忠烈公佐聖來守遵以公墓宿將及掘上  
 兵部揭子逾崇禎辛巳王忠烈公佐聖來守遵以公墓宿將及掘上  
 府道緩郭吳之獄致逆會入寇城破王公來巡視公率十里土司  
 之搗賊營安分兵新王公絕歸路錄  
 一卷書今惟吾家存將復高祖德未必非蕩遷想見靈之來喜  
 添一代孫子孫不易爲撫首增浩歎汝母羅百具試兒心向先

鱗列圖與書錯以聿與研古印大如斗中央獅伏跽寸幅我新  
畫上有米家山抱持不可律爬按隨掀翻乃左持古籀右手持  
天元大笑真吾子此意寧非天我年十七八逸氣摩空蟠讀書  
掃俗說下筆如奔川謂當立通籍一快所欲宣狂謀百不遂親  
老家益貧頭顱近三十心平無波瀾窮達知有命浪走無乃顛  
觀海難爲水一藝思專門幾年費心血略識書數原父菑子肯  
穫夫豈不願然卽今盛平世經術招儒冠立成具推步不用咄  
與蕃兩闡禁篆體隸楷須同文兒亦焉用此來踵阿爺跟六經  
麗日月義若東溟寬取汲任其才收效無鈍頑小用爲帖括命  
來卽稱官騰身九霄上袍笏光且鮮一生免長餓親戚分唾殘  
世閒富貴人得力文幾篇兒其速長大破樓思著鞭與作鼠銜

薑寧爲麥爭秬

秬有麥爭場最早熟而利倍見羣芳譜

經嵇侍中祠

碧血飄零雲鳥悲雪中憑軾弔荒祠似聞叔夜冤魂語不及王  
儀尙有兒

望鄉吟

一灘高五尺十灘高五丈行盡銅溪四百灘銅厓應當青天上  
厓上還有千萬山一重高出一重顛待到銅厓望鄉國又似從  
此看雲閒山高如梯水如箭到家早晚櫻桃綻心隨飛鳥去悠  
悠白髮紅綳眼中見萬里真成一夢游茗山重認雨中舟桐花  
落盡春風老杜字催人坐白頭

追寄莫五北上

重安江前雪映天知君此時到其閒兩夫舁之擔一肩荒荒瑟  
瑟山復山子行十日我西還播城雪夜雨似綿以吾念子衣枕

寒知子於吾亦懸懸人事乖迕堪浩歎隔六十里乃天淵舊約  
送子意頗繁既去矣復從何言少年科第世俗便一日聲名卽  
聖賢子兮織錦古斑斑媚世復解煊牡丹又始弱冠誰不妍金  
門玉堂無子艱念我才具未老堅論獻遠媿鼂賈班折腰屈膝  
又所難自計豈能事上官雖云汝墳迫周磐密縫之心亦可憐  
取彼償此心已酸况又未操必得權吾以此乃今閉關縱有貴  
命寧棄捐父母俱存兄弟全癡兒問字妻紡棉詎免身勞心以  
安但無遠別吾終焉子今偕計趨春官歷練駿骨閱山川河聲  
嶽色浩漫漫吞納胸中同鬱盤獨慨宿學近頗慳罕聚輦轂散  
若煙阮雲程春二老海內觀子往謁之間淵源必有告子乎勉  
旃高堂雖老健加餐長昆弱弟善承顏及茲餘暉快著鞭木天  
固有君舊氈然止藉此爲親歡得意慎勿受所牽明年馳傳歸

白田阿爺攜子笑欲顛阿娘撫子衣錦鮮孺人見子屏風邊我  
從山中繫行纏秋堂與子對床眠聽子聞見勝今年作詩一笑  
隨風傳

自霑益出宣威入東川

出衙更似居衙苦愁事堪當異事徵逢樹便停郵便宿與牛同  
寢豕同興昨宵蚤會今宵蚤前路蠅迎後路蠅任詡東坡渡東  
海東川若到看公能

中秋飲韓仲山<sub>錫</sub>學博官舍

韓博士家多美竹孔宣公宅有高樓荒城勝賞無他去此夕清  
狂可自由著我樓頭看皓月借君竹下過中秋銜盃卻憶巴陵  
夜一點團山萬里愁

寄答莫五



南北二萬里得歸便可喜止當看山來名心淡如洗君才不一  
世君心有竊比水母目濛濛焉識長鯨事何必說高言不入里  
人耳自非此病藥固讓洩勃使且吾觀古賢誰能不骸飢金待  
百鍊柔木要九枸美安知屢摧挫學問不在此邇來吳橋上樞  
塵光玼玼左對而右弄弟妹繞肩背朝會小齋食夜溫北堂被  
閒來擁寒氈鉛槧伴鍼黹富貴誠無權茲豈不足恃俗兒那可  
道追羶若奔蟻神血先未凝尸蟲食其髓可憐負當年羸作昏  
昏鬼念此聳毛骨百年固無幾父母七尺軀責備塞天地區區  
一科目真不與榮靡我今老復懶貧賤不自恥瀾浪適平夷半  
載絆鹽米叔夜本無蝨把搔不自己數月斷家書鄉夢亂難理  
未識今年秋溪田有收否又未識家人御冬作何計阿卯出門  
時論語讀數紙至今知所誦曾否到孟子悠悠我之思腸中轉

輪似如何接君書亦復窮爾爾下無縫袴襦上無奉甘旨吾儕  
儻定窮理也奈何彼子貧且在家我貧更客裏客裏貧轉甚春  
衣今未褫日夕數來店弟輩默以俛擬得一個來茲事有人叱  
依然滿篋書隨渡烏盤水攜手慰離索一笑愁城圯翻甕飽黃  
齋冷尋紅葉寺更當出祕籍共讀梅花底

歸化寺看山茶

小花團團火齊珠大花軒軒紅盤盂高花燒天天爲枯低花照  
地地爲朱丹霞大帝御花國氣象想見唐與虞沐日浴月爛百  
寶春風沖灑元氣麤蕩蕩海光照金碧山門檜柏排千夫我來  
看花適正月更有小妹相攜扶眼迷不認一切佛興熱欲返巢  
經廬口談樹高向母贊指形花大爲母娛但恐此景未親見鹵  
莽而言終謂誣題花要令現紙上正爲此花天下無吁嗟此花

天下無

次韻和郡守平樾峰

翰

懷陳省庵

玉

鑿

劉研莊

詔

陞

兩前

守

貴仕無令名不如不尊顯文官祇愛錢不如為牧翦朝廷用書  
 生亦曰其言善豈其所讀書到官即收卷治法止兩端世有幾  
 人闡甚或剔刻之傷我枝蹄趼冤乎頌德碑曷不刻稍淺陳劉  
 兩郡守是誠循吏選遐陬井校中鼓衆走且喘一滴父母心百  
 年尙神緬劉公實儒者教不薄窮徧至今多能文皆公為梯棧  
 陳公山繭法此日更繁衍衣食到傭丐金珠滿原巘大府近請  
 祀於陳極黽勉我惟此二公並當銘鐘銑劉父陳也母教養惠  
 無辨可念在當時肫摯忘軒冕湘川與白田車或日再轉

陳公始教

蠶於白田壩劉公始闢湘川書院

此風遂難得未免重繭堂堂平大夫繼畝

思舊吠長言發嗟詠此意更加腆世有明練材囊愴而卷鬢寸  
善將自私誰肯道前典觀公用意處已足見敷展後來今視昔  
過之不獨踐企風觀化成歌德我何覲

出門十五日初作詩黔陽郭外三首

錄二

策名公家言其實止求食一飽寧必官吁嗟遠行役思便自此  
歸輾轉不能得事非盡由己徒念山中石強歌不成歡假臥不  
安席夢醒覓嬌兒觸手乃船壁我本窗下人胡爲異方客身世  
難盡言去去自努力

記我出門時梅花繞茆亭攜兒坐石上吹笛使酒醒山妻持鐙  
來大字寫縱橫妹女各袖扇爭書壓吾肱闐闐一宵事不知雞  
已鳴今朝梅樹下小卓當窗櫺寒日在黃葉蕭蕭兒授經讀書  
究何用祗覺傷人情不學耕亦得看我黔陽城

下灘

前灘風雨來後灘風雨過灘灘若長舌我舟爲之唾岸竹密走  
陣沙洲圓轉磨指梅呼速看著橘怪相左半語落上巖已向灘  
脚坐榜師打懶槳篙律遵定課卻見上水船去速勝於我入舟  
將及旬歷此不計箇費日捉急流險快膽欲懦灘頭心夜歸寫  
覓強伴和

觀上灘者

縉者尻益高詹諸鈍爬沙篙師跌臆熊又若曝肚鼃一上復一  
上舟如緣邊蝦游游競尺寸終見舌勝牙哀哉水不平民勞致  
堪嗟萬一纜中斷倒衝寧救邪念昔榜銅水灘更多於麻裸挽  
冰雪底髀肝紅赧赧錐刀利能幾不給半筋奢努力灑陽船腰  
環猶可誇

度歲澧州寄山中四首

錄二

卯卯今夕樂樂到不可名不解憶郎罷但知燒粉蒸守歲強不  
臥喧攪至五更班班稍解事鍼縷亦略能頭試活蒼花安排拜  
新正章章小而嬌其舌甘若錫亦知歲已盡向母索珠嬰阿耶  
十年來慈祥喜淵明青袍誤愚我殘鐙澧州城安得與爾輩叫  
躍如沸羹今日趁么回

鄉俗以除日爲么

假面可市曾卯須張飛胡

章也稱鶻艷還應篋黃竹預辦鰕蟹鐙他年若命來似耶今遠  
行此樂便難得徒令涕縱橫愁思無可寄笑調聲淚并

爆竹聲已銷鄰舍亦罷博把盃念吾生飛鳥究何託姿年逝將  
老精力坐銷鑠學宦亦良策山林固予樂誠恐爲俗牽遂令一  
生閣如今倘便決求田事耕鑿盡力得逢年或勝虛俸薄何必  
父母身持受達官虐弟輩不更事望我踐纍若焉知妻妾羞百

倍衣食惡且當練勤儉晚食而早作

愁苦又一歲贈邵亭

愁苦又一歲何時開我懷欲死不得死欲生無一佳大雪滿中  
夜曉來四望迷當當滴破榻雷聲繞檐階悽切結中腸事事憎  
慨歛生本乞者相強命金閨才徒然止自苦何益於所爲今年  
正月朔旅發澧水湄沿道樂歲首兒女粲紅衣彼時吾與汝凍  
面兩相隨暮求飯店宿朝食風棚糜徒看人婦子各自媚其私  
相攜過大江宜城行可哀寒風劇刀劍吹僵如輿尸黃黃塵洞  
中見舍盡掩扉喉中默念死心煖僅一絲卅里小河口主人真  
賢哉呼門卽開門延客至中閨盆弦坐少婦其火良亦微裙邊  
早屣手何暇避嫌疑至今尙感激可謂襄陽耆明日勢必去稍  
喜寒易支易驢漢水上驢劣又難騎雪花大如蝶片片飛上眉

爾驢善跪語十里九爾祈回頭看兩笥雙丁連將之路人詫見  
怪裊裊過習池塗窮事乃絕欲哭轉自哈過此篋而車春煖冰  
漸漸艱辛四十傳塵垢至京師外極行路難內極慈母悲隨人  
携柳籃試罷精更疲日日琉璃廠爛紙縱所窺熱處不解就嘲  
罵理亦宜一朝敕放歸火牌去若飛載書出國門麥苗綠正肥  
回望太和殿念此萬里來螻蟻何足道衝風爲我悽塵漲蘆溝  
橋麥帽堆斗泥步至長新店憊極坐道歧相看似土偶欲笑口  
不開含沙宿良鄉自此晝夜馳四更清風店街閉苦重飢燈擔  
來豆乳授客長銅匙柳根快數椀味絕今尙思夢夢到樊口驛  
以舟當差危乎渚宮下浪駭天忽迷小舟八尺長中流隨簸簸  
魚鼈逐到岸鬼活魂暗啼南行雜水陸遂至鼎山涯望家廿日  
程艤舟謝緒祠謂言拜家慶可及角黍期安知鎮遠水頃刻上



俾倪洞庭大於天蛟龍恣盤嬉流尸宿船底淹戶守寸隄十日  
斷舟行浪聲但走雷伏篷米漸竭何問鹽與齋延緣至辰陽囊  
底看盡資爾遂食兩驛余溯銅仁溪歸來喜俱存兄弟亦怡怡  
萬里問何得笑指書幾堆飛鳥幸息翼但願粥與鮭朝暮倚親  
側又可事纂批豈不賢飶空徒苦脚板皮好事賢郡守乃念地  
乘非經百六十年山川當發揮文獻向來缺侗也實無知顧以  
一日長主持爾見推能如驂之靳搜剔力不遺舊稿無一備作  
者頭腦乖每每對之歎不足爲光輝意欲與導源人卑言易卑  
終思竟此業匪望千秋垂使識漢郡縣不與苗疆儕自盡後死  
責職競由人譏狼星射東井羽檄忽紛披遣發兩省兵辨此一  
山龜龜巢不易拔兩月老我師遠者思逃亡近者多仇離當食  
每不飽夢中半鼓鞞愁來但看劍恨不碎其肢那能更修文日

夕念仁棊伋平太守一火殲厥魁手提血髑髏擲向妖穴灰  
凱還笳鼓競正值鞭春時父老各色喜前時命如雞心懸今始  
落歲去已莫追邨邨買牛事閨閨紛滿街余亦獨何心不歸對  
母妻鶯軒嗒然坐一一入所思計來爾猶愈歲晚依南陔養餘  
復有事顧弄雙嬌孩我誠自尋苦天闊誰必羈命也未如何遣  
悲遂成詩

鈔東野詩畢書後

峭性無溫容酸情無歡蹤性情一華岳吐出蓮花峯草木無餘  
生高寒見巍宗我敬貞曜詩我悲貞曜翁長安千萬花世事難  
與同一日卽看盡明日安不窮貞曜如有聞听然囚出籠

桃花二首

佳人一別一歲餘遣二茅龍爲致書古宅嵩陽渠好在東溪明

月近何如未知前面路猶幾止覺今年頭易梳寒食清明將到  
了可來共喫桃花魚

桃花李花歷亂開一日吟此一萬回燕子不情竟無信黃鶯無  
故亦不來時時清晝獨此酌兀兀醉眼臨高臺錦繡山川想仙  
去茂陵劉郎真蠢才

寒食游桃源洞至湘山醉歌

桃源洞旁滿桃花春風吹嘶犁眉騮簫聲引入綠深處桃花泥  
人且須住太白高樓鶯亂鳴太白何年此聽鶯一世餐霞弄雲  
海飄零綠杖隨風鐙引盃到口戒遲緩已覺落花多幾瓣有酒  
莫澆黃面兒有錢莫繡阿羅漢君不見繞郭重重萬土饅頭挂  
人脚脚拄肩兒孫卽醉一樽酒欲視無光語無口百年手足得  
自如不解運動已太愚手可以提酒一壺足可以向花林趨好

山好日不用一錢買送到眼中皆畫圖洞天福地孤老之院耳  
幾人雞犬同妻孥鸚鵡鷓鴣看將夕更銜一盃來侑吾一盃一  
盃吾不識湘山之路矣青巖白鹿歸來乎

題新昌俞秋農

汝本

先生書聲刀尺圖

秋風起哀音吹此慈竹林行行竹林下誦公懷母吟吟聲和淚  
聲滴我思母心請爲皋魚歌和以子夏琴蒼天何高高海水何  
深深可憐一寸心死此一塊肉身矣恐不男男矣恐不育既育  
望兒長既長望兒讀豈要苦兒讀投胎我貧家貧豈必讀書祖  
父此生涯爾勿學他兒他兒福命佳爾勿定爺守欲飽放爾爺  
爾勿怨阿孃阿孃不爾搗黃雞屋角叫今日又生子速讀去拾  
來飯時吾爾飼種餘有罌底包餘有牀裏速讀去探來全家吾  
愛爾姊妹不解事惱爾讀書子速讀待筮來從我取蔬水有蔬

苦無鹽有水復無米速讀待春來飯糲先搗與書衣看看昂兒  
衣看看長女大不畏爹兒大不畏孃小時如牧豬大來如牧羊  
血吐千萬盆話費千萬筐爺從前門出兒從後門去呼來折竹  
籤與兒記徧數爺從前門歸呼兒聲如雷母潛窺兒倍忿頑復  
憐癡夏楚有笑容尙爪壁上灰爲捏數把汗幸赦一度筭哀哀  
摧肺肝歌哽琴咽彈天耳爲我塞地鼻爲我酸苦力種來禽禽  
來不能餐極意作織成成織不能穿徒枉一世心不博一日安  
蠢蠢者紙堆纛纛者新阡負母非一塗因公附斯篇

留別樾峯二首

半月相從榕樹陰苦將秋雨挽離襟男兒要去直須去那復愁  
乾愁滑心

三坡曲

少年從何來飄飄上三坡一上一回老紅顏能幾何  
欲識三坡路看儂紡若何轉轉復轉轉日斜棉尙多

自大容塘越嶺快至茅洞

午經大容塘瑣瑣詢老卒蹙額指前箐君去慎莫猝此坡二十  
里窈窈煙火絕爾來惡劫徒伺客恆出沒不論士與官商賈更  
待說吹葉作號令齧至魄已奪稍難刀刃下乞命解禪襪來如  
神猙獠去若鬼飄忽中坡名嶺快昨歲增埃卒孱兵四五人汛  
戶書常閉縛去觀所爲往往負株櫛君知九股遺諸種近潛結  
黎平及鎮遠僻所亂如髮大者殺過人小者盡財物事覺官持  
役役遇肝腦裂無已官自行先聲震羌虜官經東山去民報而  
山發形已似流賊倉卒能盡述守土飾安治揜著不敢泄大吏  
信其然更爲最其伐豈知貫盈勢隱隱待斧鉞觀君眉目善所

蹈必逢吉聞言久沈吟顧子悔攜挈此曹豺狼性或遇那得脫  
期會詎許違變勇陟亂岳是時天向黑氣象更慘切陰寒杉木  
林一翠靜兀兀下顧暗無底上窺密無缺旋塗盤修蛇向背覩  
胡越兒子置我前喜懼乘見滅怪鳥突一聲怯膽懸忽掣輿夫  
去默默快若風攪雪移時見人邨相喚顏色悅却望高蒙龍知  
向何處出夜寐尙屢覺醒乃寨苗聒平生飽艱虞此信穿虎穴

寓宅牡丹盛開

山城過雨三月初春風吹出紅盤盂荒庭無人白日靜蜂貪蝶  
媚紛紛趨坐教蘭蕙俯首視何況桃李漫山粗主人近貧不收  
拾嘉植委置隨榮枯富貴根或造化厚不賴人力還藎敷朝霞  
肯惜借顏色夕露更與增濃腴飛燕凌風鳳拗顛玉環薄醉雞  
頭酥捲簾一看一羞歎此花此客誠相孤居停要得貴游子堂

上百寶明氍毹美人新妝起歌舞玉管銀簫天馬駒胡令廣文  
伴晨夕傾國豈宜山澤癯昨思沾酒錢不得今來坐客氍毹亦無  
發言徒取紫雲賤借問苦覺青蓮汗閉門藏恥未可罪違已獻  
笑真難吾何殊蕭娘對老楮未擬正叔逃名姝向花一噓謝不  
敏譏評草木非區區

次昌黎符讀書城南韻示同兒

至聖孔尼父亞聖孟子輿兩家無父兒自解勤讀書惟其勤讀  
書道德塞太虛儻恃腰脚健逸蕩成童初夏楚雖丈二焉能及  
里閭當時兩聖母哭死亦無如爾今既有爺祝爾同祭魚食肉  
又頓頓衣絺又疏疏炎天何修修夏屋何渠渠不學復何事人  
頑豈成豬爾母生爾來寶於月中蛛不肯就外傳恐爲人所蛆  
車旁一卷經紡讀同起居爾年十四五此意不念歟古人書滿



腹強半作客儲謂奪爾母愛出遊勤有餘豈料心益放狂童狂  
也且家裏念予季瓜蔬含淚鉏焉知正逸樂驕若立耳驢老農  
不耕耨任詡三歲畚騏驥不舉足終年守階除聰明且如此愚  
也而裾裾男兒要自憤朋友空面譽學問大如川衆流會歸墟  
老陶就衰矣嬾惰隨阿舒信如子不子有粟吾食諸木石諒非  
爾捫心自躊躇

論詩示諸生時代者將至

我誠不能詩而頗知詩意言必是我言字是古人字固宜多讀  
書尤貴養其氣氣正斯有我學瞻乃相濟李杜與王孟才分各  
有似羊質而虎皮雖巧肖仍僞從來立言人絕非隨俗士君看  
入品花枝幹必先異又看蜂釀蜜萬蕊同一味文質誠彬彬作  
詩固餘事人才古難得自惜勿中棄我衰復多病骯髒不宜世

歸去異山川何時見君輩念至思我言有得且常寄

贈劉生子瑩之瑋生布衣業燭籠為活

華亭蕭木匠富水李衣工詩並傳當世生今繼此風窮居臨糞巷秀句出燈籠吾道無紳布懷哉五字功

山亭聯句

雷餘續蜂鬩雨去送蟬唱鄭珍殘紅拂階明老翠亞檐宕莫庭

芝修炎鬱陰霾頃霽開遠曠莫祥芝端軫憂以紆合并素一暢

鄭知同危亭便箕踞草具雜盆盎鄭珍煎菽脆摻卵晶茶鹹比醬

庭芝刻物鑿情竅延景啓目障祥芝平林雜花妝遠岫濕煙葬

知同舞庭雀若巫鏤地蚓逾匠鄭珍鴨煩苗色勞蠶了柘氣王庭

芝行蟻舁蟲蝥驕魚玩鼈將祥芝攫天柏心豪升木瓜膽壯知

同婢自石角出孺緣葉縫上鄭珍長謠詠石帚抱膝思葛亮庭芝

共晚松是因擇交竹堪傍

祥芝

暮霞千錦舒新月一弓

報知同

酒腸我有限詩肚君無當

庭芝

篇成付阿買尙似昌谷樣

珍

書遣知同以十七日歸五首

自我來鎮遠不撤惟菽乳佐之菘波陵菹兒及芹母每食數必  
備鮮鮮照寒俎於我已有餘放箸腹如鼓門斗竊相笑天生菜  
園肚慣喫犒農飯稱作種田戶一笑謝善禱吾豈如農圃頓頓  
此盤餐儻獲天長與何論老廣文卿相吾不取

歲行已臘半歲事忙市塵吾亦念林廬擬遣兒還山悠悠我之  
思上念父母阡東鄰與西舍渾室沸上元而我墓祠下婦豆姑  
執籩爲官令家榮象乃蕭蕭然此何不得已苦要同食眠又以  
感山妻一子二十年無一回度歲不在裙褕音寶邊我生命已爾  
至今恨萬千何忍又似我母子相挂牽獨處又幾何過正當來

還惟憐關山路僕僕風雪顏

僕僕去復來曰嗟念予子一生匙兄弟艱瘁焉得已猶喜衣衾  
厚虐寒亦足恃憶我如汝長殘臘洞庭水孤身將一舟雪奔武  
陵市囊空又禪薄冰床擁鐵被思家在何處終夜戰兩齒汝今  
誠慶幸寸步穩先擬從古行路難幾人鍊術智男兒生世間終  
要慣行李去去健黃犢期汝正月尾

選得荔波教諭

荔波漢母歛縣地第一  
尹公之鄉產煙草

爲口求官三十年論資且足買山錢千金大物方歸手

捐例舉官

費千金即得近  
日附學生亦然

八品高級等上天教澤敢承母斂水家人已羨

荔波煙乾坤漠漠干戈滿恐此頭銜亦枉然

元日行至谷洞

亂山六十里一我兩昇夫寂寂雨還歇悠悠溪谷紆富貧村店

閉來往路人無始歎乾坤內畸民獨腐儒

初到荔波二首

峯巒越盡見平原  
蒙石微曛映雨痕  
田下江寬思置艇  
樹中城小望疑村  
路人怪看皆書擔  
烏鳥驚飛已郭門  
莫作居夷寥落意  
此間便恐是桃源

叔重弟子起遐荒  
毋斂封疆入渺茫  
始笑平生稱小尹  
坐疑今日到家鄉  
蛾羣撲撲爭燈火  
蝠子啾啾滿屋梁  
麤糲了飢供睡事  
折花當帚拂塵牀

九月十六日挈家發荔波

老去運轉拙兩年  
歷艱難去冬挈家出  
脫命戈戟端五旬  
喪雙孺念來輒心酸  
荔波實窮陋春上謂  
少安數十小偷兒  
延延蔓且蘭夏杪失  
山脚三洞境逼連

距邑三洞里百獨山

邑宰此防禦

月餘嗟潰還吾生強好事是時本閒官出身爲保境設險籌其  
先千夫轉木石突兀見九關蒙石里打鼓里山梨樹樺樹幻時

水江瑤慶九里隘手諭十六里促結毛葫團雨夜遣門生邱生泉募

練馳南丹小友召翁昂王拔買練錦健兒爭赴援宰窮帑斷絕餉

又焦吾肝匹馬入村落婉勸輸金錢民愚不急義富者但乞憐

或拔牛一毛我舌亦已乾自從七月來戰守城完完狂賊浸入

境煽投狄家蠻北不盡水婆東不盡九千皆里嘯呼逐客戶焚

宅分園田我練既大集邑宰蔣嘉乃病纏遊擊率之去馬清威

聲震蠻天破賊百里外八月廿六不殺賊旋卻賊更延又出一大

捷九月初六殺其王號一過水錯燬其五岩獲牛馬數一夕嗟三遷重

關置不守賊遂臨郭前九月十三晚凌晨出攻擊易若風掃煙

此時若追逋使彼無一旋乘勝剿數若大懲懾其頑彼畏我如

神招撫庶可言如何卽退入堅閉城門糧營卒競功賞忽已兩  
日間奔者旣萍聚來者復鉤牽近寨十逃九城中半空闔誰歎  
與吾守中夜起浩歎事變知若何我非民社權武城有越寇賢  
躅許躋拔告罷又月來名存實非官門生百里外埽舍心久專  
庶以息老夫脫此危邦患秋郊日慘色紅樹緣江干露擔數千  
卷出入妻孥閒回首望白厓漸遠增愴然涼風吹馬首蕭條異  
山川悠悠歎吾生哀樂送百年數也可奈何何必辭阻艱

劉三行

名芝山字伯龍以功得從九品賜藍翎弟叔龍芝文粵人呼劉三劉四也

溱浦劉三勇絕倫熊眼虎步儒士身南丹治鐵兒其羣起殺粵  
賊賊益齟笑視千萬如一人手提鐵礮六十觔蹲置膝上承以  
肱右手發火雷怒聲鉛子百貫如空行子未落地繼又轟擲礮  
拍手看賊崩乃公懶追縱使生連日大戰南丹平論功推與士

哲兄坐看五馬加雙旌

三族兄士哲秀才至治依三每從討安賊三靈以其功與之今官襄陽知府

知從九何功名治畔延師授五經  
荔波苗孽擁螽議擬柳地治飛  
書速之至爲我疾馳二百里開口不說殺人事  
殺氣時向眉間起大酒宵酣把君臂青眼乃今見吾子吁嗟三乎吾老矣

### 芒場

南丹不可住浩然思故鄉攜家指西北山氣何荒涼  
匹馬穿茅林馬身林中藏茅花拂我眼茅刺叢我裳  
終日不逢人知越數十岡大山名山產良錫惡子雜五方  
去年作逋藪降者身手良前月所致練殺賊信莫當日  
落過其下顧畏增徬徨前途不可卜且喜至芒場

### 六寨

天晚投六寨入店主驅客謂賊燒豐甯此止廿里隔全家擬卽



避君請去他宅倉皇了無計斗覺天地窄街人方紛驚此拒彼甯得婉語向主人意轉還好色作炊進土缶苦道且強食萬一賊果來相攜走山匿敬謝主人意一覺天已白

戈坪

偷途越叢山賊遠終膽縮戈坪晴無日慘慘鬼門複來蹊長茆  
隱去徑垂綫續山口千人呼仰望但雲木意必豺狼羣高視規  
我肉命窮輕死生險熟隨禍福行歌上均際矛戟列似竹團長  
指衆言當公出前谷相驚賊掩至各已戒義簇笑子悻我魂吾  
亦駭汝目一恐有乘除慰言兩無辱

聞十月十六日荔波知縣紹興蔣曉雲

嘉穀

擊賊於縣東

西十里水錯河力盡死之

狄苗生苗一時變兩月恃者三百練礮倉鏤窖亦已無勢不死

守卽死戰嗚呼大吏坐視如不知一令死若殺一雞天令若輩  
斷黔國君職已盡何唏爲

旋聞十月二十日南丹練首從九品 賞戴藍翎劉芝山  
擊賊城外中銃子死死後二日其弟芝文率部衆出城  
與賊殊死戰殺賊尸幾與城平其兄及蔣令二樞從歸  
南丹衆亦遂散

嗚呼世禍知未已無用不死有里死平生千里不留行兵事好  
還爾何悔季也縞素揮雙刀兩棺捲過血漲濠匹夫報友報國  
盡於此孰要天子知其勞

貴陽送邵亭赴京就知縣選兼試春官二首

林臥已云晚問君何所之不堪離別意豈是宦游時欲說都難  
說相看祇益悲生非無好命歎息十年遲

與君三十載親愛等同生別面無終歲傷懷獨此行宦成歸不  
易吾老去非情藻堰郴州月何年管送迎

藻米堰在余墓廬側  
椰葉洲在邵亭墓廬

臘中種竹

畧畧東邱似廢臺求泥種竹笑心孩傲韓偏欲石間大學杜還  
於臘月栽久識此君無熱性要宜肥地必凡材明年看我龍孫  
茁始信先生妙手來

正月十六戲書

鐙節行看過兒童又爽然抱書愁上學牧犢怒持鞭老子卻成  
喜新正劇可憐今朝藜莧腹纔得脫葷羶

二月二十日以病新愈命同兒赴貴陽書寄劉仙石

書年

觀察

病起忽若夢不知此何節惟見櫻桃花滿山白如雪憶我除日  
歸絕粒已半月居然不許死天意豈無說持杯歡口飲汝窮命  
真鐵

三年棄校官無疾羨藜藿醫師頗相妒不買一錢藥豚豕蹴唐  
園陰陽患因作飢飽有定分違卽攘其鑿逝結無情游行歌老  
帶索

讀書牛欄側三首

讀書牛欄側炊飯牛欄傍二者皆潔事所處焉能常讀求悅我  
心食求充我腸何與糞壤閒豈有臧不臧

幽幽小窗光耿耿微炭火蕭蕭白髭叟把卷終日坐雨中十餘  
日亦覺腰膝跛來時杏初花起視花已墮

瓜雪山樊圖

馮門山順治初昭覺丈雪大江師避難來結道  
場地之幽勝殆難爲匹樂安唐元和志

古之柏帶蒼蒼又然名環穹東牢而水南經去山諸佛麓回當廢深之潭絕巖臨山之坡陀以  
 不甚高回得山水礪壘皆峻峭其不易者幾自巳未來吾鄉中人妹苦黎於湘湄佩賊  
 縣君大舊回家之桃花頂余谿上避賊依母家亦將由此山中成人其屋三  
 印花丈師約殘雪以隨筆塗染庶他時談山故者愛而見我指云同一

九治日二年柴翁三月記月

吁嗟生不辰將老逢百罹漫謂書上辭乃今親此事三年厭避  
 亂具禍日加厲何地置老夫西指草堂寺春風吹孤雲忽墮蒼  
 巖際

平生楊妹子自小親愛殊古來中表間兄妹如此無各已畢婚  
 嫁白頭弄孫雛相看豈無命時運堪嗟吁回思十載前豈料爾  
 此廬匪惟爾此廬吾豈就爾居人事難逆計苦業須消除枯魚  
 復相沫後此知何如

此日是何日此山是何山  
新林靜潭影好鳥鳴關關  
三杯出斯圖撫之慘我顏  
編茅二千家強半皆飢瘵  
惜余非耆域曷以扶汝孱  
慈悲海上人遺影留此間  
當年菩薩果不忍聽草菅  
叱起三生石漫言無住還

和淵明飲酒二十首

錄一

參差五男女媚爺爭酌喧  
爺醉顏如花臨風反以偏  
念我蓋棺時汝曹扛入山  
風雨一堆土有酒豈得還  
今日及舌在用飲莫用言

往攝古州訓導別柏容邵亭二首

錄一

月下一杯酒誦君詒我詩  
小別何足道因之動離思  
王事不可延公家有程期  
細雨蠻邨路春風燈火時  
能無感行役天命良自知  
此官誰使然正坐好爲師  
此地誰使然亦爲喜變夷



近代詩鈔

江忠源

忠源字岷樵湖南新寧人道光丁酉舉人官安徽巡撫  
諡忠烈

寄郭筠仙意城昆仲

訂交近十載相見能幾霜京華一相失各在天一方昨夜夢見  
君攜手入我堂覺來仍萬里殘月照我牀吾思齊年中莫如與  
子臧子今既憔悴我意亦淒涼淒涼何足惜但恐鬢毛蒼各理  
千秋業努力愛時光

發都門二首寄別曾滌生庶子

久客思鄉非常恐歸無時僕夫已趣裝又作別離悲別離隨處  
有感君入心脾逢人誇我賢相對仍切悃緬思古人交形隔神



相隨君非私我好此意我自知西風何太急臨歧吹我衣  
向晚渡桑乾月暗雲水黃平生四度過今夕真淒涼我友已爲  
鬼我師復病牀咫尺行不易况此道路長蟋蟀號四野悲風動  
陰房遙憐高堂上今夜夢還鄉

近代詩鈔

孔憲彝

字敘仲號繡山一號秀珊山東曲阜人道光丁酉舉人  
官內閣侍讀有對嶽樓詩錄

阻雨謠

不雨憫農夫既雨愁客子不惜行路難爲汝老農喜

破車歌爲錢冬士作

隆隆九陌馳雕輪爭策高足來要津中有一車緩且破無人知  
是郎官貧郎官雖貧意良適退食朝朝訪佳客道旁拍手任挪  
揄我道先生車甚澤先生早歲遊皇都黃金賣賦輕相如一朝  
忽從大夫後古義詎可吾行徒東家贈馬西家車馬如芻狗車  
行徐先生高坐樂復樂吾車雖破良勝無吳興老友好事者

沈啓

府霞明

忽發高歌爲摹寫先生大笑許知音一日喧傳滿輦下先生自號破車翁更煩點染圖畫中長吟自喜有生氣畫圖不及詩篇工我與先生交廿載清狂故態今無改門前但聽破車聲除卻君來更誰待猶憶去年花落時青春中酒歌將歸先生乘車日頻至爲我高唱陽關辭竭來京邸常相過下車索我歌長歌我歌未工失君意歌聲空逐車聲多長安索米真無奈出並無車安得破東華鐘動趨直時請借先生破車坐

近代詩鈔

葉名澧

字翰源一字潤臣湖北漢陽人道光丁酉舉人官至內

閣侍讀有泝澹集敦夙好齋詩集

黃香鐵歸自開封出詩卷見示即贈

西風幾日攀條別匹馬中州覽古來秋草難尋朱亥里短衣獨  
上孝王臺河聲嶽色歸吟卷紫笛金箏悵酒杯憑弔漫增賓客  
感已看健筆勝鄒枚

天寧寺塔鈴歌

明司禮  
保造監

天風無聲銅仙泣浮圖高聳十三級塵沙飄墮懸鈴孤廠臣馮

保名可識雙林松檜參天長遺窟久付狐魅藏雙林寺馮保營

也字風雲魚水信難恃風雲際會魚水相逢皆得毋鑄此諛空王

近代詩鈔

葉名澧

三千寶珉雲中舞塞耳不聞鐘與鼓燈火高懸燕薊郊膏脂力  
竭東南土威權早竊薦紳危象教有靈神鬼怒青玉崢嶸飛鳥  
絕此塔歷遍興亡劫九鼎潛移十廟荒異代傷心有殘鐵噫吁  
嘻奄人倒柄持太阿鐵牌豫誠良非苛煌煌祖訓將如何

陶然亭題壁

江家亭子傍城隈載酒平臨霽色開遠水欲波鳧共泛空廊初  
雨燕飛來殘幢何代理斜照敗壁尋詩拂舊苔可惜三春花事  
少青紅誰爲滿庭栽

讀建寧耕者余某詩卷寄贈

自號癡樵子與張亨甫善  
亨甫攜其詩卷於行篋

朝出事耕稼夜讀忘劬饑我心葆厥初與世終不移有瓜復有  
葵有桃復有梨有廬傍隴畝先人之所遺旭日照桑麻班坐談  
皇羲酌我素心侶時復哦新詩邱中有至樂豈與桃源期

送丁儉卿歸山陽

交君未爲早別君一何速恨非影與形不得常相逐執手望浮雲須臾變原陸強言會有時爲歡恐不足悲風入我耳憂思亂心曲顧瞻淮水長明月照君屋歸兮抱遺經聊以樂吾獨

甕子洞

重灘連九谿涉險自茲始篷窗正高臥大聲忽驚耳冥冥日光寒鬢鬢石狀詭雷霆轟八埏冰雪薄萬矢窄徑闢嶮巖扁舟鬪犀兕不知千載下盆涌何時止十夫牽一桅號呼無停趾鐵絙攀半厓跬步異生死灘前幾人家衆木自叢倚寒蟬時一聞謾謾晚風起

北斗灘

怪石凡七  
隱若斗杓

靈憲炳蒼昊璣衡司中央雌雄貫左右坤絡呈其光恍惚乘靈

槎遨遊漢津旁日月出其裏宇合爲低昂滄滄萬古天一氣涵  
茫茫千巖爲喉舌萬壑爲酒漿紫霞我爲佩翠雲我爲裳仙人  
儻可遇乘風共翱翔

孔舊華

憲恭

孫怡菴

謀

招遊龍樹寺

陂陀迴佛寺識路有青驄雲木納深秀菰蒲交遠風開軒臨古  
堞載酒當孤篷名輩題詩在沈吟夕照中

文璧上有鮑覺生  
桂星詩刻

清明日炯甫繡山南樵招飲同賦

夭桃細柳弄春晴那禁餘寒撲面迎相覓故人謀熟醉自離江  
國幾清明軍聲回望風煙苦宦味深嘗鬢雪盈但得歲時佳興  
共不辭健步更郊行